

1

1995

*di vê hejmarê de*

Selîm Berekat  
Hevpeyvîn

\*

Newafo  
çîrok  
-Nîzar Agirî-

\*

Gogol  
Pakto  
çîrok


\*

Brodskî  
helbest

\*

Uzunname  
lêkolîn  
-Rezo Osê-

DUGIR





# dugir

kovara kurdî li derveyî welêt li gor rêziman  
û vekîta zimanê kurdî ya  
**Mîr Celadet Bedirxan**  
dê her sê meha carekê bête weşandin

sal:

Februar 1995

jimar:

Xwedî:

**Dr. Saîd Mele**

Birêvebirên kovarê:

**Ehmed Huseynî**

**Zagros Hajo**

**Yehya Yûsif**

pergala rûpelan:

**M. Lewendî**

berga pêşîn û  
berpirsiyariya hunerî:

**M. Seîd Huseynî**  
(S. Rêzanî)

Adres/Navnîşan:

**DUGIR**  
BOX: 3437  
165 23 Hässelby  
SWEDEN

Telefon:

46-8-36 65 16  
46-225-15 873  
Faks:  
46-225-15873  
46-225-14406

Postgiro:  
692357-7

Abonetiya salane/year: 150 SEK

ISSN: 1400-5913

## Pêşgotin

DUGIR, wek pirojeyeke hewldanê, ji bo vejandina peyva kurdî, dê besdarî bizava dîroka îroyîn bibe, ev besdarî jî dê ziman, wek alav ji bo avakirina çend xal û pirsên balkêş rakêşîne gorepana guftûgoyeke girêdayî bi seviyeta hişyarî û zanîna rewşenbirê kurd li welatên mişextî û penabriyê

Renge ji destpêkê ve hewldana me têkçûyî be, renge di tengerê û duryanê xewna kujdar de cihekî dilovan ji vehesîna giyanênu zuhabûyî re peyda nebe, renge em bi bişkivîna arezûyan û bi gulvedana zersosin û sorgulên çav qerimî şâ nebin, renge jî, li ber dengê gurmîna rûdan û bûyerên diramatîkî yên welitekî birîndar, ne peyv bikaribe li hember gullebaranê raweste û ne jî ziman bikaribe hêvî û xwezayan di gulistana xwe de bihêwirîne. Lê DUGIR wek piroje, dê li welatên seqema gawirane li koşyeke aramê bigere, ev aram dê ne arameke xav û zuha be, çinkî dê bi guliyêñ êgir û bi werîsên nalîneke dijwar dorpêckirî be.

Di wê koşeyê de hewldana bercestekirina xewnê dest bi qolincêni dayik bûnê dike.

Wê gavê ji dayikbûn bersiva mirinê ye.

Wê gavê hewldan jî ji xwe re rêçekê ber bi ronahiyê de diqelêse.

Wê gavê piroje dest bi gava pêşîn dike da ku çar gulên reng qedexe li ber kêla miriyêñ DUGIR a bi xweliyê nixumandî, biçîne.

Sawa herî kovandar a ku me hogirî hewldanê dike ku em bikaribin pirekê di navbera xwe û welêt de damezirînin, ku em bikaribin peywendiyeke gur û germ di navbera derive û hundir de, di çarçewa dan û stendineke rewşenbirane de bi alavêñ afirandin û dahênan rastîn, bigewde bikin.

Derve wek serencama dûrketina ji himbêza mehreban û jiyana di nav pencêñ bêrikirin û bîranînan de. Wek şaristaniyeke cihêreg û zimanekî nuh, wek nakokiya di navbera rojhilat û rojava de; nakokiya civakî û siyasi û aborî û rewşnbîrî û hismendî û psîkolojî.

Hundir wek azar û êş û bindestî û hejarî, wek mirin û kuştin û koçkirin û talankirin û kêferata rojane ji bo bi destxistina nasnameyeke netewî û çareserkirina çarenûsa milettekî ku li ser devê sînoran sirûdêñ azadiya xwe bi xwînê dineqişîne. Hundir wek bizaveke ronakbîrî ku di bin sîbera tirs û metîrsiyê de zimanê xwe diparêze, kesayetiya xwe diçesipîne, çand û wêjê û toreya xwe vedijîne.

Bi avakirina pirê û bi damezirandina wê peywendiya gur û germ, renge, herdû rexên hevkêşê bikaribin bi hev re îstgehêñ tirajîdya gelê kurd ronî bikin, naverokekê ji dîroka şînî û renckêşanê re bibînin, û alavêñ derbirîna hunerî ligel kûrahî û berfirehiya wê tirajîdyayê biguncînin.

DUGIR

# Hunermendekî Kurd

## Ebdulrehîm Husêن (Rehîmo)

Di 1957'an de li bajarê Amûdê ji dayik bûye. Di 1991'ê de ji Akademîya Hunerên Sipehî ya Şamê diploma hunera resimkêşanê wergirtiye. Beşdarî gelek pêşangehên hevpar bûye. Ji 1993'an û vir de li Belçikayê diji.




foto: Arif Zêrevan







# Naverok

**10**

Selîm Berekat  
-gotin-

**11**

Selîm Berekat  
-danasîn-

**12**

Selîm Berekat  
-hevpeyivîn-

**15**

Selîm Berekat  
-bîranîn-

**19**

Rezo Osê  
-Uzunname-1-  
lêkolîn

**23**

Rindê Çeçan  
-Ji bo te(helbest)-

**24**

M. Efîf Huseynî  
Dengbêj (çirok)

**27**

Brodskî  
-Dîlokeke mezin bo John  
Donne-  
w. Ehmed Huseynî

**33**

Gogol  
-Palto (çirok)-  
w. Narîna Haco

**37**

Tengezarê Marînî  
-Valahîyeke sênckirî-  
(helbest)

**39**

Nîzar Agirî  
-Newafo (çirok)-

**41**

Ehmed Huseynî  
-Naaa!! (helbest)-

**45**

Pirsa Gelê Kurd  
Li Başûr-Rojavayê  
Kurdistanê

# Selîm Berekat

Gotin

Ez zimanê Kurdî ya devkî dizanim, çinkî ziman wek nivîsandin qedexe bû, herwisa qedexe bû -jî-ku em bibêjin em Kurd in.

Dêmek êrîş li ser nasnameyê bû neku li ser zimên bû, zimanê ku yek ji me dikare bi lalî bi kar bîne.

Taybetmendiyêñ nasnameyê (huwyetê) dikarin rêça hebûna surgunbûnê û hebûna surgungehê destnişan bikin.

Vêca nivîsandina bi zimanê biyaniyan ango zimanê yê dîtir hestekî di cî de ji bo herifandina newek-heviyê pêwist nake digel wê labîrênta piçûk a ku nakokî wê ji dayik dike, lê eger hewldana te ji bo derbirîna nasnameyê qedexe bibe, wê gavê sirgun dest pê dike.


Ez Kurd im. Erê, dikarim giyanê xwe bi hezar zimanî derbibirim. Lê, wexta ku zimanek tenê ji wan zimanan hewl bide ku kurdayetiya min merbend bike, wê wextê sirgun, ci li vir an ci li wir, di doje-ha ku desthilatdarî ji xwe re dike qanûn daku nako-kiyan ji holê rake, dest pê dike.

Kurdayetiya min wek nasname bi zimanê Erebî dewlemend dibe. Ji bo ku êşa min bikaribe mukurhatina xwe pêşkêşî cih bike; zimanê erebî gorepana azadiya min e.

S. Berekat

# Selîm Berekat

Danasîn



Selîm Berekat yek ji Kurdên erebinivîs e. Di cîhana wêjeya erebî ya nûjen de rolek balkêş ji bo herifandina şêwe û awayen kevnar, çi di warê helbestê de be û ci jî di warê romanê de be, lîstiye.

Di hemî berhemên xwe de li ser rewşa gelê kurd radiweste, hewl dide ku tîrajediya Kurdan bi şêweyekî hunerî bigihîne wijdan û hestên xwendevanên ereb.

Di sala 1950'î de li gundê Mûsêsanâ ji dayik bûye, piştî kutakirina hersê qonaxên xwendina xwe li Qamişloyê, dest pê dike û li xwendegeha bilind li Şamê edebiyata Erebî dixwîne. Di sala 1974'an de ji Sûriyê derbider dibe û li Lubnanê dihêwire. Ji sala 1982'an ve li Qubrusê bi cî bûye.

Selîm berekat sê pirtûk li ser zaroktî û ciwaniya xwe nivîsandine; yek ji wan hatiye wergerandin ser zimanê Firansî û Elmanî. Di warê helbesta serbest û nûjen de şes pirtûk û di warê romanê de pênc pirtûk nivîsandine.

Ev hevpeyivîna wî di rojnameya El-Heyat de beriya nuha belav bûbû û ji ber ku hevpeyivîn pir dirêj bû, me ev herdû pirsên ku bi nasnameya wî ve girêdayî ne wergerandin Kurdi.

DUGIR

# Selîm Berekat

Erevpeyvîn

"Min hewl daye ku  
kûrahiya xelkê Kurd zeft bikim"

Pirs-Di herdû pirtûkên xwe de (Sisirkê Hesini û Ka Bilind Bide Min) tu li ser zaroktiya xwe di cihana bakur de dipeyivî, cihêwaziya vê zaroktiyê ci ye da ku wisa di du pirtûkan de û di hemî berhemî te de bête bi cî kirin, ez dixwazim tiştine dîtir li ser jiyana te ya li wê herêmê, li ser meriv û dostan, li ser malbatê, ji te bibihîzim?

Bersiv-Yekcar tiştekî taybetmend di zaroktiya min de nîn e. Zaroktiyeke têkçûyi bû wek hemî zaroktiyên dîtir li vê rojhilatê. Mişt qedexeyî, bi sawa mezinê ku bi darêن xwe diçûn û dihatin dagirtî bû.

Bi wê karîna malbatek sade ku gerdûn bi pîvanek ji gewdeyê Newton mezintir şirove dikir, dagirtî bû. Mebesta min gewdeyê Gamêş e: Gerdûn li ser qiloçen Gamêş rawestiyâyi ye. Li hawirdora te hemî cih bi giyanan dagirtî ne. Cinê çak, pîrevok û fîristeyên xwedan defterên mezin ên hesab.

Hemî aliyên zaroktiya te dor-pêckirî ye, gerek tu li kîrinêن xwe mikur bê, tu talanbûyi yî, hêviya ku tu razîbûnê qezenc bikî nîn e, hêviya ku tu sezayê sivik bikî nîn e, di temenê xwe de tu xelatekê wernagirî, seza bi dû sezayê de, hînkirineke bêhempa da ku tu yekî dî bî, wisa ji malbatê ta dibistanê ta

dewletê, pişt re di Meslexa yê dî de mirin çavlırêmana te dike.

Zaroktiyeke wek hemî zaroktiyê tu tiştê ku wê cihêwaz bike nîn e.

Tirsa normal her û her ew bi xwe ye, hînbûna dek û dolaban, fen û fûtan pêwist e da ku tu ji sezaya ku dê bibe xelata gunehkariya te ya ebedî, rizgar bibî, gunehkariya ku çîma tu zarok ji dayika xwe bûyî.

Her tişt te dehfîde da ku tu mezin bî, gerek tu ji malzarokê bi mezinahî amade bibî, gerek tu belgenameyek ji belgenameyên xeybê bî li ser (çêkirina) bûnewerê razîbûyi û qayil û kêfxwes, mebesta min ê melûl û ne şirovexwaz.

Pirtûkên ku min li ser zaroktî û ci-waniya xwe nivîsandine lîskek e, lîskek ji derveyî, pêşbirka ku di navbera hişyarî û pêwistiya hetmî de li ser hatiye lihevkirin bo zaroktiyê li rojhilat, ku ew bi xwe deng-vedana nezaniya mezinan e, metirsiya wan e, hêviya wan e jî ku bi alikariya zarok tiştekî qezenc bikin, tiştekî ku wan bi xwe nikaribûn qezenc bikira çînkî ew bi xwe têkçûyi ji dayik bûbûn. Min li ser vê têkçûna ku xwe dirêjî mezinan kiriye, bi awayê wênekirina têkçûnê wek wêneyek qederiyane ji wêneyen zaroktiyê, min nivîandiye, min daye wênekirin ku têkçûn zaroktî bi xwe ye.

Renge jiyana xelkê û qederên

wan hinekî bi rewambêjiya lêbûrînker hatibin nivîsandin. renge di rastiya xwe de rûdan ne wilo bin lê, nivîsandin tîrsa ji sedîsedkirina tiştan e, madam min li ser çarenûsan di Bakur de nivîsandiye, ez venaşêrim ku carina min ew bi hinek bitri re guherandine. Ev ne lêmikurhatine lê destnîşankirine ku çawan nivîsandin dikare diziyyê ji perawêza dequekî giranbuhatir, xwînamêz, pêkenînker, ku bi jiyanê qayil nabe, bike. Zaroktiya ku gerek bihata vegotin tu carî dê neyê vegotin çinkî renge bîghêje pileya derewan û kufrê: Ew zaroktî tiştekî din bû, ji ezela xwe ta ebeda xwe birîndarkirî bû, veçiryayî bû, êşdar bû, derzdar bû, şewatperest bû, westankar bû, li cem hemî gelên dîtir di hemî pileyên temenan de di çesnê wê zaroktiyê de nîn e

Îro, dema ku ez li dorhêla xwe li zaroktiya van bûnewerêni piçûk, li gelek rexên cihanê, temaşe dikim, ez nabêjim ku çêtir e yan jî nizimtir e lê bêguman ez dê nikaribim bidim dannas-kirin, û dema ku bi awirêن çavê xwe yên tarîbûyi li zarokê xwe yê bi tenê temaşe dikim bêpariyek dijwar ji zaroktiyê min ji wî dûr dixîne "Xwedayo!" ji xwe re dibêjim û berdewam dikim; Ez dê ji ku dest pê bikim, da ku ez zarokatiya wî binasim.

Mezinan, çinkî tîrsa ji sezaya ax-retê kûrahiya hinavêwan dagîrkiribû, dixwestin, ta pileya dawîn ku em zîrek û şareza bin ku em di hundire çarçewa êşê de hozan û hosta bin, ji xwe eger ez li ser herêmên êşê di serpêhatiya zaroktî û ciwaniya xwe de bipeyivim dê tîp bihejin, bireilin, dê yên xwendevan

guman bike ku ez ne li ser hişê xwe dipeyivim, ku ez serpêhatiya xwe dikim pêşengeha hetikandinê.

Belkî rojekê ji rojan ez wê bi-nivîsim bi mebesta ku ez tola xwe ji jîyanê bistînim, eger hat û bû dê lêgerînek dijwar be, lêgerîna li peyvîn dirindane yên di paş êşê de, ku li wir, qet, zaroktî nayê rîzkirin.

Ma gelo ez xwe didim vî alî û wî alî? Bi piranî me tu zaroktî nedîye.

*Pirs-Gelek caran, di wêjeya te de li ser doza nasnameya Kurdî hatiye peyivîn. Tu çawan li peywendiya xwe bi vê nasnameyê re temaşe dikî, hin dibêjin ku wêjeya te pir egoyst e, bi daxwazek kilasîkî ji bo bigewdekirina vê nasnameyê ye, ango Necîb Mehfûzekî kurdî di romanê de?*

*Min xwestiye ku kurd di  
çepera herî dijwar ya  
nivîsandinê de bin*

Bersiv-Ez bawerim ku nasname ev peyva pir ne zelal, li cem hinekan, ku

çiqasî pê hatibe listin jî, angoya pêvajoyeke nijadî werdigire, herwisa angoya newkheviyeke mumkin û sînorê ji yê dinê cihêxwazî ji bo xwe çesipandinê di çarçewa yekîtiya hevbes û giştî de, werdigire. Di vê de afسانek pir mein peyda dibe.

Di kîjan yekîtiya mirovî de be ku çiqasî sîmayê wê yên çandeyî û olî û nijadî dîmenê tenhatiyê wergirin, dê wekheviyeke giştî tê de peyda nebe, bêguman dê nakokî eşkere bibe, di revakirinê de, di mulkiyetê de, di desthilata şexsî de û di parastina fermanê de. Min xwestiye ku ez xwe bavêjim dîwarê li paş nasnameyê da ku ez çarenûsê derbibirim, çinkî li wir pêvajoya xweçesipandina min peyda dibe wek qederekê di nava qederan de ku nasnameya min li wir e.

Ma gelo ez Kurd im? Erê, dêmek de bila bi azadî, bi hêsanîyek dijwar, ez bikaribim bibêjim ku ez Kurd im, ku navê bavê min navekî Kurdî ye, ku em bi Kurdî bi hev re, bi mirîşkên xwe re, bi berxên xwe re, bi çêlekên xwe re, bi mêsênhunguv re, bi bexçeyên xwe re dipeyivin, tenê wilo. Cih wek cografiya di seqema xwe de, di gemkirina xwe de, di talankirina xwe de, di zordariya xwe de û di kuştina xewnê de ji bo me û ji bo xeyrî me wekhev e. Lê wexta ku ji bo me duqat bibe, bibe newekheviyeke komedî wek komediya reş, wê gavê em ber bi xwe de vedikîşin, ber bi kozika xwe de ya pir tenhatîxwaz.

Di dibistana navîn de, carekê tiştek bi min re çêbû hetanî iro jî ez ji ber vedijiniqim. Dersa me li ser tevgerên cihêxwaz, ji wan tevgeran jî tevgera Kurd, bû. Ez nizanim çawan zimanê min şemîtî û min tiştek li ser kurdbûna xwe got, şagirtê ku wek leşkeran amade kîribûn, di cih de karbideştên dibistanê agahdar kirin, kî bawer dike ku di destpêka ciwaniya me de hin şagirt tenê ji bo gelaciye amade kîribin. Birêvebirêñ dibistanê civînek wek encûmana cengek rastîn lidarxistin. Pişti danûstendineke dijwar ku hestiyêñ min ji ber dilerizî, mamostayekî komunist wan bi berdana min ji dibistanê haş kir, çinkî wana ne tenê dixwestin ku bera min bidin lê ligel wê jî dixwestin ku min radestî parastina leşkerî bikin.

Ez bi xwe di derdekî netewî de hiç neramiyabûm, mala me ji regezperestiyê xalî bû, bavê min mirovekî oldar bû, bi yek pîvanê li hemî gerdûn temaşe dikir. Ha va pişti bîst salan ji mana xwe li tenişt doza Ereban a yekemîn ez ji xwe

dipirsim: çawan dikarîbûn zarokine piçûk szazde salî ji bo gelaciya Kurdan bikarbînin?

Wek ku av av e? Hişê min li wir ma, di navçeya xwe yî Kurdî de dijî. Lê bi nisbetî nasnameya min wisâ ye: Bi kurtî ez naxwazim ku ez tiştekî din bim!

Carekê nivîskarekî Ereb ï pir binavûdeng ku şanoyan û senaryo û helbestên mişt nakokiyê komedî dinivîsîne, ez bi regezperestiyê û bi dijminatiya Ereban gunehbar kirim!!! û belge?

Ez li ser Kurdan dinivîsim. Hawar hey hawar (ew bi xwe partiyek ne ereb diparêse) lê S. Berekat Ereban bi kîsek pîvaz difiroşe. Wî bi xwe jî pişti Şerê Hizéranê di şanoyeke xwe yî rexnekariyane de û di germa rexneya zatî de hemî dîroka Erebi, nizanim bê bi çi firot !

Min bi wî awayî li ser ereban ne-nivîsandiye. Ev serê 17 e salan e ku ez doza erebî ne ya kurdî di nivîsa xwe yî heftane de, wek rojnamevan, li ser milên xwe dikim. Lê eger ez qehremanen romanen xwe ji navçeyek din bînim, tiştekî seyr e ne? Kurd bi vê cografiyayê, bi hiş û bîra vê cografiyayê şérêzkirî ne.

Ji bo besê diwemîn ji pirsa te. Min hewl nedaye ku ez realîta kurdî wek dîmen wergirim, mîna Necîb Mehfûz ku (dîmena Misrî) bikartîne. Na Tu carî min wilo nekiyîre û nakim. Min tiştekî din kiriye: Min hewl daye ku ez kûrahiya xelkê Kurd zeft bikim, wek hebûn zeft bikim, ne wek çirokan li ser bûyeren kolanen wan û hundire xaniyêñ wan, min xwestiye ku kurd di çepera herî dijwar ya nivîsandinê de bin ku çarenûs li wir nabin dîmen, lê di tîrbûna nexuyayî ya jiyanê de dîbin gurmîn.

\*\*\*

# Selîm Berekat

## Bîranîn

*Xwezka ey zaroko xwezka!*

Tu çi dibînî ?

De ji min re bibêj hey zaroko bê tu çi dibînî!?

Du girik di aso de dixuyin, gerdeniyeke ji gundan û axeke ku di navbera havîna serserî û zivistana kawik de li ba dibe.

Civana te hey zaroko civana ligel şînahî û balendeyan e.

Tu çavên xwe bi ser sibehênu ku ji selikên xwe serçavkan diweşînin, digirî. Tu hişk bi rişmeke nediyar digirî mîna ku tu xwe ji pîrbûnê re amade bikî yan jî pîrahî xwe ji te re amade bike, da ku hûn bi hev re wê efsaneyâ ku carekê tenê dijene; kurt bikin; efsaneyâ ku jiyan ji bo dûbarekirina jena wê xwe dikuje.

Xwezka hey zaroko, tu tiştekî dîtir ji bilî wan tiştên ku te dîtiye, bibînî.

Ma gelo te çi dîtibû?

Ma ji bilî nalîna erebanan û çavkaniyênu ku ji zixtên tozê bazdidin , de ji min re bibêj te çi dîtiye!?

De sextekariya forman rawestîn da ku form li te ewle bibin. De min najo bi alî wan hevalênu ku reh û tov himbêz kirin û serên xwe bi hêminî danîn.

Lê, tu bi Xwedê kî, tu yê zorbaziya ewran û berfê ji ser min sivik nekî. Ez te di navbera wan de dibînim, tu çûkan û demê serjê dikî, tu ji boyî zaroktiya zemînê kûrekûra xwe li ser dêmên zemînê belav dikî, tu xefk û dafênu xwîna xwe yi serxweş belav dikî da ku tu dastanê qezenc bikî.

Tu zarok î, ma ez çi dikarim ji zarokekî bixwazim ji bilî ku bakur gişî ji ser cil û bergên xwe daweşîne. Bakur gişî, mal bi mal; dar bi dar; rûbar bi rûbar; bênder bi bênder; gulgenim bi gulgenim; tav bi tav; ma ez dê çi bixwazim ji bilî ku denênu asoyê bişêkîne da ku refen hechecik û qitikan biri-jin?

De birrev!

Bi qasî ku lingên te bikaribin ji babelîskekê berbi babelîskekê ve birrev!

De ji xweşiya deştan re dilê xwe yî piçûk bilind bike; deştên ku bi tîpan û cîqan di ser dev re çûbûn.

Ma di dengê te de dengekî wawîkan nîne?

Ma di dengê te de dengê derzekê nîne?

Ma ew xweşiya têkçûyî ya ku di pesindanê de peyda dibe di te de jî nîne?

Tu zarok î, ma ji bilî asoyekî mişt bager, kî dikare bageran di te de dîl bike?

De rê bide min da ku ez xwe li bin siya mertalê te wek bobelatekê ramidînim.

Destên xwe ji şolikan re, ji roavahîyan re vedikim, wek evîneke win-dabûyî, wek evîna wê koçbariya ku qazmên xwe li bûneweran rakişandiye û tu zarok î, de ji min re bibej te çi ji "zarok" dîtiye? De bibej!

Min dengê te rût di nav dengan de dît, dengekî bîncikyayî, mîna keze-beke şikeşti ji terk û derzan başok dipekiyan û das dipijiqîn.

Axxx ! Hey zaroko! Min te çiqasî di çîrokê de bi çavine vekirî dibihîst, te dilê xwe yî piçûk ji serpihatiyê re rêzdikir, erê tu ji serpêhatiyê re lîska beybûnê rêz dikî.

Tu ji bîr dikî bê te çawan bi xencera xunavê xaniyêñ Birîva û Mûsêsanâ û Amûdê û Kêstekê û Buharengê û Mozan û Sêmitik û Hilko û Kûçikê û Interiyê û Tirbesipiyê û Agûlê û Heremreş û Heremê Şêxo birîndar kir.

Tu zarok î, erê tu di bêrîkê xwe de şoqilên bejî berhev dikî, tu kulîlkên gulpiwongan berhev dikî, tu hewl didî ku pasvanêñ genim te bibînin da ku tu wan bixapînî. Ew pêkenîna te ye; pêkenîna serxweş mîna xwîna te yî serxweş e, pêkenîn e te ew di nav xefk û dafêñ xwe de ji bax û bexçeyan re vedida; û dema ku bax û bexçe di xefkin te de werbûn tu keniyayî û sira bayî jî li hawirdora te dikeniya.

Te û bayî bi hev re radêñ xwe qoçan kiribûn, we bi hev re li zurneyekê dixist da ku hûn serserîtiya bûneweran raperînin. Bêguman, piştî vê müşextiya bêserûber; me naskir ku tu bûyî.

Tu bûyî yê ku rêça erebanêñ hejîran kola bû; bi qırşık û çiqulan nixumandibû da ku qantrêñ Semano tê de werbin û piyêñ wan bişikên..

Tu bûyî yê ku têla kontakkirî bi dergehê firna Murado ve girêdabû; ku her yek dihingivî têlê diqîriya..

Tu bûyî yê ku gundor ji ser bêñ bi ser kûçikê Felemezo de gindirand û ji nêvî de ew pûç kir.

Tu bûyî yê ku dîkê Hêlanê yê qirik rût û kumik bi kevir birandî, kuştibû.

Tu bûyî yê ku îsota sor xistibû nav ava qazêñ Seqmûro de, pişt re qaz har bûbûn..

Yê ku darê Kitam ê kor dizî bû, tu bûyî. Yê ku quloçê beranê Mîro

şikandibû, tu bûyî.

Yê ku dixwest goristana Hilêliyê gor bi gor veke da ku bibîne bê çawan mirî di veşartgehêن xwe yî teng de bi hevûdû re dipeyivin; tu bûyî; erê te xew dikir û xewna te jî ew bû..

Lê tu zarok î !

Ma kî dê zarokê ku bi birûskên beybûnan hatiye lêdan û di navbera şinahiyekê teze û ewrekî teze de tar û mar bûye; súcdar bike!??

Ax, me çiqasî ji te re got: Nêzîk nebe!. Nêzîk nebe hey zaroko, nêzîkî kavilan nebe, lê tu nêzîk bûyî da ku tu jibermayêن kaşê ji ser kavilan berhev bikî; da ku tu sirûd û dîlokan bixemilînâ...

Bêguman me dizanibû ku li seranserî qonaxa vê giranxewa ku rehêن xwe ber bi gavêن me de ajotiyê, tu hişyarbûyî bû. Giranxewa ku mîna gustîlkekê li ser eniya serkeftinêن me nîgar kiriye. Lê ji bo ci te em anîha şiyar kirin û te em sipartin tinaziyê, ji bo ci hey malava!??

Em mezin in hey zaroko! Mezinine ku li ber dergehê demê bi çingeçinga hesin dilîzin û kanzaya (maddeya xam) sarkîrî dibarînin. Em mezin in; em qederêن xwe ji hechecîkeke neagahdar û ji xweşiyekê re nabilînin. Em ji bilî hişmendiya hêzdariyê li bejna xwe nakin.

Eger tu hewl didî ku careke dî xwe di paş pinpinîkekê de veşêrî li hêviya me nemîn; çinkî yê me; em dê li bin vê çingeçinga bêdeng a rolêن bêdeng rawestin, em dê rawestin û em dê qulocen bizinan li beramberî pêvajoya pékenînê bilind bikin.

Lê te bi şiyarbûna xwe re em jî şiyarkirin da ku em bibînin ku çawan tu derbasî dergehê şinahiyê dibî; ku çawan li pey te stêrka rijayî ji avê û ji perikan bû. Da ku em te di nav çekêن sibehê de bibînin ku çawan tu deştêن Kêstekê bi alî Nisêbînê de dehf didî; ku çawan tu guh nadî pasvanêن sînor û bajaran; pasvanêن ku tîr ji kevanekî lal berdane kêfxweşîya te. Wê gavê tu mîna dilekî sermest ramidandî bûyî û mîna dilekî sermest tu mayî ramidandî.

Ha va tu me bi çavêن serê xwe dibînî (Em ên şikestî û bi şûn de vegeryayî) ku çawan em ji newalekê berbi newaleke din ve bazdidin, da ku em bişûnde vegera layan ji ser xwe rawestînin; da ku em anihayıya bêlay nebînin.

Erê...Erê, de hema dirêjkirî bimîn hey zaroko! De hema zarok bimîn lo! Mane ev daxwaz a reh û tovan e, mane reh û tov bi vî awayî dil dibijînin te.

De îca den û çeydanan bi qasî ku tu bixwazî bişikîn, ma ne tu di serserîtya xwe de şîrîn î, tu di desthilatdariya xwe yî bêmînak de şîrîn î...

Dema tu çepera li dor gulan radikî û tu gulan diperpitînî , tu şêrîn î...

Dema ku tu li ser piştä berên siwar dibî û tu wî har dikî, tu şêrîn î...

Ku tu keviran davêjî çavkaniyê û çelekên li ser avê vediciniqînî, tu şêrîn î.



Ku tu gumgumokan digurînî û hêlînên çûkan diherifînî, tu şêrîn î...  
 Ku tu şolikan didizî û xefkan li ber kevokan vedidî, tu şêrîn î...  
 Ku tu bênder û pisîkan dişewitînî, tu şêrîn î...  
 Ku tu gamêşan ji êxur berdidî û tu wan sergerdan dikî, tu şêrîn î...  
 Ku tu nikulên dîkên romî girêdidî, tu şêrîn î...  
 Ku tu li ser stêrkên xîşokane û li ser avênu ku baskên balendeyan li xwe  
 kirine dipeyivî, tu şêrîn î...  
 Ku tu li ser wî hespvanê ku ewran bi qamçiyê xwe dajo, tu şêrîn î..  
 Dema tu li ser erebanê di binê çem de dipeyivî, tu şêrîn î..  
 Dema tu li ser rovî û nêriyên taristanê dipeyivî, tu şêrîn î..  
 Dema tu li ser qantirêñ por dirêj dipeyivî, tu şêrîn î..  
 Tu şêrîn î... Tu şêrîn î!  
 Tu bi Xwedê kî tu yê bela xwe ji me vekî!  
 Tu yê ji ser pişta me dakevî!  
 Lê belê tu, yê şiyar û çav vekirî, tu me jî şiyar dikî da ku em pêkenînê bi  
 dar vekin..!

-ji pirtûka Sisirkê Hesinî-

# Uzunname-1

Rezo Osê

Mehmet Uzun

TU

Roman

Min di nivîsa "Biêlim" de soza rawestanekê li ser berhemên Mehmet Uzun dabû. Lê mixabin ku ez nikarim soza xwe pêk bînim, da ez derewîn dernekevîm, ezê tenha li ser romana Tu rawestim (ji berhemên din re ji xwedakî me heye).

## Romana Tu bi kurtî

Romana Tu sala 1984 an, li Stockholmê, hatiye çapkîrin. Ev roman ji 220 rûpelan pêk hatiye. Bi du beşan hatiye avakîrin. Nêxê pêşî ji, di danî-na tevna heyber de, çîroka Kêzxa-tûnê ye. Di rengê avakîrinê de, nivîskar xwe dispêre forma têbîran (flash back). Wilo, roman, bi bûyera girtina nivîskar, ji rûpelê pêşî ve, tê hûnan-din û bi mana wî di zîndanê de kutayî dibe. Dema bûyerên romanê, ya di aksiyona avakîrinê de, di navbera salên 1956-1972 an de, kenar dibe.

Gava daner di zîndanê de ji xewa mirinê hisyar dibe, kêzikeke biçûk û reş li ber bêfila xwe dipelîne. Vê kêzikê dike Kêzbatûna xwe û hevpey-vînekê pê re di zîndanê de vedike. Di rîya wê re xwe, malbava xwe, bajarêna xwe, civaka xwe û hevalêna xwe bi xwêner dide nasîn. Ji hêla din ve ji desthilata xwe, zor û sitem, zîndan û îşkenceyanêna wî belû dike.

Nivîskar, bi vî şêweyî, dîroka

jiyana  
xwe, ji  
salên za-  
rokî, tanî  
girtinê,  
bi dar ve  
dike û le-  
hengiya

xwe, di romanê de, pê bi pê, gav bi  
gav, beşdar û berçav dike.

Wilo romana Tu di rîya Kêzx-  
atûnê re, dibe Uzunname.

## Soza berê

Bêguman, rexnê di romana- hey-  
bera- Kurdî de cihê xwe negirtiye. Eger hin pelandin di vî warî de hati-  
bin ji, bi ser ku romana Tu di warê  
rexnelégirtinê de, yek ji romanên  
pêş-kêş e, lê di behweriyê min de,  
me derdê xwe di vê romanê de ji -  
weku gelek berhemên din- nas  
nekiriye, da em karibin derman bi-  
kin. Çawa? Ji ber ku em taybetiyênen  
gelê xwe, civaka xwe, zimanê xwe  
naxin bin kontrol û pîvanê. Ne ten-  
ha wilo, lê em li gor pîvanê teorî  
ji nameşin. Ew pîvanênu ku bi asanê  
(eger em banê asoya têgihiştina  
xwe di warê rexnan de bilind ne-  
kin) nakevin kirasê heybera Kurdî  
de. Lewra rexne li ba me cih na-  
gire.

Ez li ser vê romanê, ka forma  
avakîrina wê ji ber kîjan romana  
Tirkî hatiye girtin, zimanê wê ji  
kîjan kovarêna Kurdî hatiye kopîki-  
rin, narawestim. Tenha, ezê ji van

rexne û lêkolînan dûr kevim, da bi  
rê û şopeke din de bimeşin, dûrî  
binbariya hemî lêkolîn û rexnelê-  
girtinan. Wilo, ezê li ser çend xalêñ  
taybetî rawestim; ew xalêñ ku bi zi-  
man û civaka kurdî ve, bi karakter  
û jiyana kurdî ve girêdayî ne.

Hûn dipelînin, çawa ez mirovekî  
pelpelokî me! Da em serê hev  
neêşînin, ezê zû li soza xwe vege-  
rim. Soza min ji -eger li bala we be-  
ew bû ku ez li ser şâşiyêñ rêzimanî,  
hevokanî (fraziojî) û romanî, di  
berhemên M. Uzun de rawestim,  
va min sukra xwe daye ber nîr !

### 1. Rêzimanê romana Tu

Pêkenînokeke Rûsî li ser fêrbûna  
biyaniyan ji zimên re heye, dibêje:

Yê biyanî av ji avfirosekê xwest, got:  
-Av sar li ba we heye?

-Ne av sar, lê ava sar, avfiroşê lê  
vegerand.

-Naxwe ka zerikek ava bide min,  
yê biyanî got.

-Ne ava, lê av, avfiroşê lê vegerand.

-Te serê min qoqiland yadê ! Tu  
pêşî fêri zimanê xwe bibe, piştre min  
fêr bike, yê biyanî got.

Belê, aloziyêñ ziman û rêzimanê  
me pir in û cihê seknê ne. Lê nivîs-  
karê nêr û mî ji hev cude neke,  
jimaran nizanibe û rewşen bernava-  
van nas neke, tiştekî ne di rê de ye  
û pir kirêt e. Di vî warî de, emê li  
ser çend bend û rêzên rêzimanî yên  
di romana Tu de rawestin. Ji wan:

### Cînav (bernav, pronav).

Nivîskarê me cînavê forma rast  
û tewandî ji hev cuda nake. Loma  
parçen axaftinê, di hevokên wî de,  
tevlîhev dibin. Wilo, kirde dibe  
têrker û lêker şûna xwe nagire.  
Belê, nivîskar di vî warî de, xweş  
dilukume, tanî nema bi ser rastiya  
cînavê lixweveger ve dibe.

Ez nikarim romana Tu ji nû ve bi-

nivîsim. Lê, ezê gelek nimûneyan  
pêşkêş bikim û şâşiyân, bê şiroveki-  
rin daxim, wekî:

### Cînavê kesitî:

di wê zivistana, ku te birin de, (r.11)  
Bêguman, polisan nivîskarê me bi-  
rin, ne wî polîs birin

Belê taya tirsê te ji girtiye....(r.32)

Te kewek girt , lê tayê tu girtî.

Axir..te heta qereqolê anîbûn.(r.  
72) Wan tu anîbûn, ne te ew bi-  
ribûn.

te ne birin. (r.75)

Wan tu ne birin, ne te ew ne bi-  
rin.

Ew polîsên ku hatibûn te gir-  
tibûn...(r.76)

Ne te polîs girtin , lê wan tu gir-  
tin.

Tu rûpelâ yekemin qulipand..., li  
ber tu bû. (r.134)

Kê ci qulipand? Te rûpel quli-  
pand, ne wî tu qulipandî, ci li ber  
kê bû? Rûpel li ber te bû, ne tu li  
ber rûpel bûyî.

Bi lez we xistin cemsekê (r.78)

Ne we ew xistin GMC(cemse)  
de, lê wan hûn xistinê.

We wekî telîsên kayê ji cemsê avê-  
tin erdê û ketin ser we (r.178)

Hûn hatin avêtin, ne we polîs avê-  
tin.

Û we bi dîwêr ve zeliqandin.

Hûn hatin zeliqandin, ne we polîs  
zeliqandin.

Hûn nikarîbûn bimeşiyana.(r.220 )  
Hûn nikarin, lê we nikarîbû.

Cînavê arzî :

Bi bejna xwe yê kin ve (R. 86)

Bi bejina xwe ya kin , lê bi zimanê xwe yê dirêj e.

Cînavêni nîşankirinê :

Tu bi wê dengi... ve kelegirî bûyi.  
(r.77)

Tu bi werîs (deng) ve hatî girêdan, lê bi deng re girî (kelegirî bûyi)

têxin wî kunçikê (r.90)

Têxin kû de?. Têxin wê kunçikê de.

Cînavêni pirsê :

Kê bûn ew ? (r.71)

Gotin jê re navê, ku dîwana Cegerxwîn (Dîwana 3.) bi navê Kî Me Ez e. Qirika Şivan bi Kî Ne Em re çiryaye.

Ew kê bû, yê li kêlekê kê bû? (r.74)

Kê kir , kê bir ?...lê , kî bû, kî ye?

Kesên giliyê min dike kê ye? (r.91)

Kesên giliyê min dîkin kî ne?(di f.p.j. de), yan jî: Kesê giliyê min dike kî ye? (di f.y.j.de).

Cînavê lixweveger:

We xwe spartin eskeran.(r.177)

(Me, we, wan) xwe spart, lê, wan (em, hûn, ew) spartin xwe (hinan)

Jimar:

Kom û tek, li ba nivîskarê me ti rolê naleyzin, dibêje:

diya te ...dest bi hedîsen wê şevê kîrin.(r.25)

Dê bi karekî, bi teka xwe dirabe. Dêmek, wê kir. Li vir, pîşkê kirinê weku makder bi bernavêni kesitî, yên forma tewandî re, nayênguhestin:(min, te, wî, wê, we, me, wan) kir.

Paşê rabûyi..., pîjamên bin balgih derxist, (r.29)

Pijamê nivîskarê me çend parce

be jî, her dimîne pîjame, nav e. Lê, eger li serê xwe siwar bibe, gerek wan (pîjamên xwe) derxe.Wilo, dibe:î pîjamê bin balgih derxistî.

Te disan çavêni xwe vekir, (r.85)

Te çavekî xwe vekir, lê herdû çav vekirin.

3. Daçek:

Daçek jî, li ba nivîskarê me, de ryake nenas e. Di nav pêlên wê de xwe winda dike, dibêje:

û ti li dîya xwe derî vekir....(r.25)

Gava dê di hundir de be, tu derî li wê (lê) vedikî. Lê ku li der ve be, tu derî ji wê re (jê re) vedikî. Dêya nivîskar jî li derive ye...dêmek: û te dei jê re vekir.

Li ser cihê pismamê te de hat bîra te. (r.128)

Li kû? Li ser cih. Lê, di kû de? Di malê de. Dêmek, daçeka li nîşana cihê vekirî ye û di nîşana cihê girtî ye.

û di mîxekî de ..dalîqandî. (r.132)

Bi mîxekî ve...dalîqand. Lê, di qulekê de veşart.

4. Nêr û mêt:

Di warê navan û rewşen nêr û mêt de, nivîskarê romana Tu, bi ser rê ve nabe. bê ku ji xwe re mijûl bibe, yan jî bipirse, gavêni xwe çavgirtî berdewam dike.

Pêkenînokeke kudî heye, dibêje: Ji yekî, ku xwe bi zanîna zimanê tirkî paya dikir, pirsîn:

-Navê kerê, bi tirkî, ci ye?

-Îşek e, yê tirkîzan vegerand.

-Navê çêlikâ kerê, bi tirkî ci ye?

-Tirk nav lê nakin, piştî mezin dibe, navê wê jî dibe îşek, piştî mijûliyeke dirêj bersiv da.

Belê, nivîskarê me jî dibêje:

Kulavekî şivanan avêtibû ser milen xwe.(r.148)

kulava ser piştâ xwe girt û danî

*alî. .(r.150)*

Kulavê nivîskarê me gih nêr e, gih jî mê ye. Gih li mil e, gih jî li piştê ye!

*Hespekî kalikê min hebû, hespekî rewanî.(r.164)*

*Em divê qedrê hespa xwe jî bigrin. (r.166)*

Hespê M. Uzun gih nêr e, gih mê ye. Gih mihiñ e, gih jî hespê kêsê ye!

*Kirîvê min Bênav...diyarê min kirî.(r.171)*

*Hevaltiya min û Bênavê wisan*

*dest pê kirî. (r.172)*

Karika M. Uzun nêrûmê ye. Eger bû nêrîkî kever, nêr e. Lê ku bû bizineke kol, mê ye!


*wekî her zîndanî, zîndanek bû. (r.183)*

*di zîndana gemarî, biçûk... (r.184)*

Zîndana girtiyê me(ya nivîskar) gih nêr e, gih jî mê ye!

Dêmek, gava girtiyê me têde lêdanê dixwe, nêr e. Lê gava helbestan tê de dinivîse, mê ye!

*(dûmahîk hejmara bê...)*



# Ji bo te

Lawaziya dengvedanê  
Tengerêyên wêneyê  
Min ber bi te ve radikişînin..

Saneyê tarî li pey min in  
Di çolistana aram û tar û mar de  
Aso li nik te dihêwire..

Damarê min stiranine bî ne  
Xwîna min sekirat e  
Derz neman e  
Neman ji bisaftina ji bo te ye..

Gorepanê demê bi mişextiyê  
dagîrbûne  
Bênderê aso bi bêrîkirinê nixumîn  
Meşextiyê hawara ji bo te herifand..

Xewn temenek bû di odayek jibîrkirî  
de jibîrbû  
Temen leyланек bû..  
Bi rengê avjîna katjiméra ji bo te xemili

Birîn dequek bû  
Deq mîna çavkaniyekê herikî  
çavkanî mîna jenê herikî  
Bi xeniqandina ji bo te lerizî..

Maçê bişkojek himbêz kir  
Bişkojê bi tîpine çelmişî ziman gerand  
Bişkoj berya ku biweşe sirûdêن  
ji bo te neqîşandi, bû..  
Berya ku tu derbasî bazbendê bibî  
Tu nimêj bûyî û wexta tu derbas bûyî  
Nimêj ji bo te nalîneke bêdeng bû..

Çurîşkek winda bû, çav winda bûn  
Gulgenimên seqemê bendewariya  
stérkan kîrin  
Û bendewarî ji bêrîkirin e ji bo te..

Di navbera peyvê û wêneyê de  
Neynikek rewrewkî ye  
Peyv qurmiçî  
Wêneyê xwe kuşt û ne-seretayîyê  
Kutayîyê ber bi te ve radikişînc.



Rindê Çeçan

# Dengbêj

Mihemed Efif Huseynî



Apê min dimire û ji mirinê radibe. Bêyî wî ode bîntengit e, di sîber û bêdengiyê de dixeniqe, bêriya wî û çavlîrêmana vegera wî dike. Ew ji dilê wê nahêle.

Odeyeke di dudilî û di raperîna apê min de dijî, zerikên sifirî neqisandî, refen kin ên pirtûkên bêdeng, kulekên ku pencere ne, ku tarîbûna hundir ser bi keviyê de dirijînin û ber bi coka çiminto yî zirav a ava apê min û nêrbûna wî yî ku pêdiviyî pesindanê ye, diherike. Perdeyên keskîn û Qunslê Mehabad, xebata rojane ya li ser destnîvîsê, hewldana jidil ku bi dengê dengbêjekî kevnar bistirê. Dengbêjekî kor e di gulistanê tarî yên çavê xwe de windayî ye, çawa dikare ewqasî bistirê, ma ne kor e?

Defek bi zencîrên zîvînî daliqandiye, meyeke kevnar ji bîranînen apan û lawên wan ku her êvar li dora wan dibûn xelek, tevnek ji tîpan, li xwe mikur dihatin li ser pîrekên ji gundên dûr dipeyivîn, hine ji bakur hatiye şandin û tama tûtina nû gihaştî, û rûniştekek piçûk ji xêzeranê ji bo pirtûka ebedî ya Apê min a li ser balendeyan.. Hersê balendeyan:

-Tawis şahê me ye, serdarê perîyan û mîrê behîstê ye.

-Kew ji netebatê ji dayik bûye, Kew ber bi hemî rexan ve dehfdayî ye .

-Birîndar şêxê miriyan û berpîrsê xewnan û rengê reş ê ku aso dinuxumîne.

-De ka hela ji vê tütinê jî bipêç lo!

Sado qutiya xwe ji Apê min re davêje, na navêje lê dihêle ku bi aramî bişemite û li ser keviya kulavê qalind raweste.

Evar li ser êvarê kom dibe, gumanek; leşkeran hişyar dike, pencereyek bi ser bakur de vekirîye..

-Pêjna lingan tê Cegerxwîn!

Di çend kîlîkan de destnîvîs têt veşartin ..çiya her tiştî dibînin, gav bi dû gavê de, û bayek di banga Apê min de dixeniqe, berya ku vegere, careke dî qiyameta wî ye, Besnê û balendeyên wî dizanin, û gîhayê bi tof ên li ser qiraxên Amûdê, kulîlkên havînê jî dizanin, û kuştî û şehîdên Sînemê jî, û peykelê wan ê li bexçeyê kavîlbûyi, bexçeyê ku bi matmayîna eşâ xwe rapêçayıye.Hespên dûr bi dijwarî dihîrin, pişta xwe ji tevzînokekê re diçemînin. Bûnewerekî ji nehneh û bobelatê, tev dizanin ku dê ji mirina xwe careke dî rabe, piçekî ji erdê bilind dibe, bi miriyênu ku beriya wî ji serdemên dûr ve mirine dipeyive,, vê carê gazin ji Mîrê pêşîn dikir, Mîrê ku beriya 154 salan miribû, çima serkêsiya leşkeran ji kuramê xwe re hiştibû, kur amê ku ew û zilamên wî xapandin, ku çiyan xapand, ku çek û barûd jî dijminan re hiştin, pişt re kîlîta kelehé ji radestî wan kir, kîlîta ku

kêferata dawîn ya bajarekî ji qiyametê ji karbanan û ji goristanê ku zivista-nê di avê de dixeniqin, dixeniqin, pertel û jibirkirin serav dibûn li Cizirê.

Dê pişti katjimerekê vegere. Pêşî dê riya xwe bi Cegerxwîn xîne.

Birîndar xwe çem dike, cûre destê xwe li karûbarê xwe sivik dike, bi hê-minî perde dihejin, xewa di germa havînê de ya li nik wî têt bîra min, û qiçina tava ku bi xêni ve sérêz bûye ji.

-Apo, Apo ma gelo te destnivîs ligel xwe anîye?

Çarçewên zêrkirî, nezaniya textê dergeh, asîtanka xêni, elboma wêney-an, sindoqên piçûk ên ji textê pîrozmand, cegerdariya demê di tarîbûna cûreyê de, Ji nişkê ve cûre ronî dibe, tiliyên pir ên mişt tûtin diteqin, bi navê wî valahî pitepitê dike û Besnê gelek tiştan dizane, lê ligel kevza şîn di avgirê de veşartine, renge beçek piçûk xwe ji heriyê ber bi merdiya avê de çem bike.

-Ev qurmiçî ji kuderê hat?

-Evaya pîvana sazdar e, pîvana sıfîrê Amûdê ye. Besnê razên xwe bi ser bakur de dirijîne û bixêrhatinê dide zilaman.. Apan.. Mîr.. Cegerxwîn.

-Ez Beqê ji destê xwe bernadim, çînkî kesk e, wek riha Apê min kesk e.,

-Min hevalek ji bo Birîndar anîye.

Balende li Apê min temaşe dike, pişt re berê xwe dide

Beqê.. wê dinukulîne, dengê pirtepîrta başkan ji cûreyê têtbihîstîn.. Den-gekî tîr, xwe li binguhê bayekî germ dixîne, bayek ji müzikâ Şêx Seîd ê ku di wê kîlîkê de bi dengbêjê kor diramiya, ku çawan dê li ba Qunsil bi navê Kurdistanê amade bibe.

\*\*\*

Ji nişkê ve mala me bi çewalan hat dagirtin.. Bi wan çewalê nûranî.. Qineb di bîna xwe de merd e, bi kulîlka kindirê mijûl e.

Ez derbasî odaya mezin dibim linik çewalan tevlîheviya xwe belav dikim Qineb.. Qineb; qehwerengiyê vekirî, xêza sor.. Tevnekarê xemgîn, tev-nekarê ku li ser tundiya werisan poşman bûye..

-Apê Sa'do wêrana xwe ji min re bihêl!

Di hingora yekemin de hespên ku bi tûtin û çekan barkirî ne vedimirin.. ji matmayinê ber bi çewalê qinebî de diherikin.

-Tu ala mezin ji bîr nekî?

Wê rojê, nîvro, sal 1946 bû, Qazî Mihemed derbas dibû, kirâsê xwe li ba dikir û netebatiya xwe bi ser zilaman de dirijand:

Generalê pêşin, berdevkê komarê, guftûgokar, konsul, û ewê nedîyar, du çav bi asoya xwînewî ve girêdayîne, bi ser sirûdê ve û bi ser xwendina kulîlkîn zer ve girtîne:

-Çima tenê yên zer?

-Çînkî Şîniya kurdan in.

Şêrînê!! Hey Şêrîna bax û bîstanan pêwiste tu xuşka min a mirî ji bîr nekî, pêwiste tu alê ji bîr nekî!

Sed sal di ser wê rojê re; di ser wê nîverojê re derbas bû ,lê hêjî bîna çewalan ji alê difûre; bîneke piçûk; rastîn, rimak, sîgirtî, çavlîrêmayî, le-

zok, bi tenha ,hergav bitenha.. Bîna cihê poşmaniyê û ciwaniya Qazî Mihemed li ber sêdarê.

Skandînaviya!!

Skandînaviya!! Berf ji hundir ve dibare, baran; kelehên sifirîni bi bêzariyê direşîne, li seranserî sala çûyî ez çavdêriya katjimêra mezin a li ser kelehê dikim, salek ji çavdêri û revakirinê, cîgeh bi hestên xwe yên req... Kevirekî reş, mermara Italyayê, kêtîn goristanan, Şîvîn hesinî yên Tiramwaya Goteborgê, bizava kevanî ya nerm a wê jina ku himehîma kevokan dide hev...

Damyana!

Şêrîn!

-Kê ev keleha ku bi nimêj û nalînan nixumandiye avakiriye?

Tevnekarê pêşîn ê çewalên qinebîni ye. Bi barûda tîr û bi kolanêñ Mehabadê mişt dibe û bi gumanan jî.

Wê nîverojê, Qazî derbasî enbara çewalan bû, li tevnekar temaşe kir, çavdêriya boyaxçiyê yekemîn kir, xwe bi wan re westand, ew danî ser masê; hinek jê bi rengê xuristiyane boyax kir. Kesk-Zer-Sor.

-Kêfa min ji vî keskî re nayê.. Ev keskaya di rengê gelaciyan de ye!

Roja dîtir; dîsa nîveroj bû, bîna gelaciyan ji ser banêñ Mehabadê difûriya, Qazî Mihemed girtibûn, leşker li hawirdora wî; ber bi külîlkêñ kindirê ve diçû, leşkerekî dikir kurtepist:

-Xwedayo! ji bo çi bîna qineban jê difûrc?


Skandînaviya!

Welatê burc û kelehan, welatê tevnekarêñ bêzariyê, Skandînaviya hey bîna Şêrîn a mirî, neqşen mizgeftê li jor in û bîna çewalên zer. Ew bîna ku pişti gelek salan ji nexweşîya sifirîni hişyar kirim.

Hêlan bi werîşen xwe ve li jor e. Şêrîn difire.. bilind...bilind.

Li derive berf dibare.

Li vir...Li wir çewal dûbare dibin, lê vê carê bi cendekan mişt dibin; bi bîna dijwar a Qazî Mihemed.





## Dîlokeke mezin bo John Donne

John Donne serê xwe daniye,  
li dorhêla wî hemî tiştan serên xwe danîne,  
dîwaran, erdê, çerçefan, wêneyan,  
masê, berran, xilqên dergehan, çengelê cilan,  
nemliyê, mûman û perdeyan  
tev mirin, şûşe, perdax, zerik, nan, kêra nên,  
qir û qafêن ferfûrî, kirîstal, lalî.  
çira razanê, çekşo, cam, katjimêr  
pileyên mîrdewanê, hemû dergeh...Şev li her cihî ye,  
Li her cihî şev e, li koşeyan, di çavan de, di cilûbergan de,  
di nav belgan de, li ser maseya nivîsandinê, di peyivîna rewânbej de,  
di bêjeyên peyivînê de, di êzingan de,  
di maşika komirê de, di komira sopeya vemirtî de, di hemî tiştan de  
Di paltoyan de, di pêlavân de, di goreyan de, di sîberan de,  
li paş neynikan, di nav livînan de, li paş rûniştekan,  
û careke dî di zerikan de, di xaçan de, di çerçefan de.  
Di bermalkên li ber dergeh de, di tiragan de, hemî tişt mirin.

Hemî tişt mirin, pencere, berfa li ser pencerê,  
Banên hevmil bi nişîvên sipî, gupîtkên wan mîna çerçefa xwarinê ne,  
Hemî xelkên taxê mirin, çarçeweyên şikestî yên pencereyan mirîne.  
Pirêñ kevanî, dîwar, pencere, hemû mirin.

Kolan, rehêñ dolabêñ textinî, şîşen hesinî, û guldank,  
ne ronahiyek diçuruse, ne jî zîqeqîqa dolaban, sûr, neqîş, zencîr, sing,  
Dergeh mirine, gustîlk, dest, xilq, zeqate, kilît û destik,  
ne kurtepist û ne xuşexuş û ne jî teqiteq têñ bihîstin,  
ji bili qırçeqirça qeşê tu tişt nîn e, giş mirine û berbang dûr e  
Girtîxaneyan, kelehan serê xwe danîn...herwisa  
hemî alavêñ firoşgeha masiyan jî serêñ xwe danîn  
Termêñ berazan serê xwe danîn, xaniyan, pişta xaniyan û  
segêñ bejî serêñ xwe danîn.  
Di veşartgehan de pisîkan bi guhine hestdar  
serêñ xwe danîn.

Mışk mirin, xelk, London jî.

Li bendergehê kelekeke bayî serê xwe daniye, av û  
berfa ku di zikê xwe de dinale ber bi dûr ve radikişê  
li tevlî esmanê mirî dibe.

John Donne mir, derya jî pê re mir,  
Perava kedañi serê xwe danîn, li ber keviya deryayê  
hemî dorav bi mirinê himbêzkirî serê xwe danîn.  
û her bexçeyek bi sê xilqan dihat asêkirin,  
reşedarê û sipîndarê, narewanê, kajê serêñ xwe danîn,  
nişîvên çiya, rûbarêñ li ser nişîvan,  
tengerêyên çiya serêñ xwe danîn,  
herweha roviyan, guran û hirçan, li ser nivînan serêñ xwe danîn,  
lê wê gavê ziryana berfê devê kunan digit  
Balende mirin, fixan û çîveçîv rawestiyan,  
Qixeçixa qiralkan nema tê bihîstin, û kenê kund jî,  
Asoya Ingilizî bêdeng e, stérkek çirusî, lê  
mîşk çû kinişte da ku xwe jî gunehêñ xwe bişo.  
Hemî tiştan serê xwe danîn, di gorêñ xwe de hemî  
miriyan serê xwe danîn; bi hêminî.

û li ser textan zindiyan di derya gumlekên xwe de serî danîn,  
yeka yeka, di xewê de binavbûyi bi tirs serê xwe danîn.

Hemî tişt mirin, çem, çiya, daristan,  
Lawir, balinde, cihana bêcan û zindî,  
Ji bili berfa ku ji nav pencen şevê dibare nîn e;  
berfa ku dê li ser serîyan serê xwe deye.

Firişteyan, pakpeyayan serêñ xwe danîn û  
ev cihana mişt metirsi di nav destê şerma pîrozmend de hiştin.  
Dojeh û behîşa ronak jî serêñ xwe danîn,  
Di wek vê kêlîkê de; tu kes nîn e; ku anuha li mala xwe  
serê xwe danayne.

Yezdan jî serê xwe danî, anuha zemîn biyan e  
çav nabînin, guh nabihîzin,

Şeytan jî serê xwe danî û ligel wî zikresiyê  
serê xwe danî ser berfa bexçeyên Ingiltirayê.  
Siwaran serên xwe danîn, fırışteyê û qeyameta xwe jî,  
hespan serên xwe danîn, di xewê de dibezin,  
û hetanî refên periyan ên ku hevdû himbêzkirine,  
li jêr quba kinişa Pols serên xwe danîn.  
John Donne serê xwe danî, çameyan, wêneyan,  
beşavendan jî ligel, ci xurt û ci lawaz winda bûn.  
Lêbelê çêr û sixêf, bêrikirin, gunehkarî, hemiyan,  
di hundurê tipê bêjeyên xwe de serî danîn.  
Her çameyek ji bo ya dî wek xuşkekê bû,  
Di gel ku di navbera xwe de kurtepistê dikin jî,  
lê her yek piçekî diheje, ji dergehêne esman dûr in, hejar in,  
tîr in, zelal in, bi hevgirtinê dagirtî ne.  
bi kûrbûn xêz serên xwe datînin, û "yambo" jî bi xurtî dinepixin,  
û "tirakîyan" serên xwe li ser herdû aliyan wek pasvanan şîpya danîn,  
û di wan de xewnêne jibîrkirinê serên xwe danîn.  
û li paş wan tiştekî dîtir bi kûrbûn serê xwe danî...payedarî ye.  
Hemî derdan û renckêşanan serên xwe danîn,  
çêran serê xwe danî, çakî û ziyanê hevdû himbêzkirin  
Pêximberan serên xwe danîn,  
û sûlava berfê li pangaveke reş î piçûk  
di firehiya cih de digere.  
Hemiyan serî danîn, û  
xirecira pirtûkan jî serî danî,  
rûbarêni gotinê yên ku bi berfa jibîrkirinê hatine nixumandin  
serên xwe danîn,  
hemî zimanîn û hemî rastiyêni ku  
di xwe de dihêwirînin serî danîn,  
zencîren ku wan bi hevdû ve girêdidin serî danîn û  
hêdî hêdî xelekêwan sist dibin.  
hemiyan di pêşbirka kûr de;çakpeyayan û şeytan û yezdan  
serên xwe danîn.  
Hemî zebeniyêne dojehê, şagirtêne Îsa,  
zarokêwan, ji bili berfa ku bi ser  
tariya kolanê de dibare tu pêjin ji vê gerdûna berfireh nayê bihîstin.  
û ci jî...! Ma deng tê te..  
li wir, di taristana sar de mirovek digirî, bi tirs kurtepistê dike  
li wir kesek heye li ber dilovaniya perçebûna xwe maye,  
digirî... li wir di taristanê de yek heye.  
Dengekî zirav, zirav wek derziyê  
bê tta, bi tenha xwe di bin berfê de maye, li her cihî seqem e.  
wek derziyê ye, derziya ku şiya ji serê şevê ta berbangê bidirû...û  
di çesnê vê bilindahiyê de..  
Ew kî ye li wir kûrekûre dike?  
Ev tu yi ey periya min, tu li hêviya vegerê yi, di bin berfê de,  
wek havîna ku çavlirêmana vegera evîna min dike?

Ma di tariya şevê de tu yê biçî malê?..bersiv nîn e..  
Ma gelo ev hûn in ey firişteyên min? Vê stiranbêjiya komeleyî  
ya xemgîn komika jinê dîlokbêj anî bîra min,  
Hûn ey mirîno ma we biryar daye  
ku hûn êdi ji nişkêve dê ji kinişa min derkevin, ma ew hûn in? Ma ew  
hûn in?...Bêdengî .

Pols ma ev tu yî? Diyare ku ji ber peyivîna serhişk dengê te qalind bûye,  
ma ewê ku serê xwe yî sipî di taristana zîz de, li wir, bi giryân  
xistiye ber xwe de tu yî ?.. Ji bilî dengvedana bêdengiyê tu tişt nîn e.  
Ma gelo ev e destê ku dîdarî veşartiye.. Destê mîna çiraxekê ku li wir  
hemî cihan ronî dike? Ev tu yî ey berêz? Renge ramanê min dirindane bin  
lê kûrekûra giryânê bilindtir dibe, bêdengî...aramî.  
Ma ev tu yî yê ku li Bûqê xistiye ey Cibrîl... Ma gelo yê ku li wir bi bilin-  
dahî bireyê dê kî be?

Ma gelo min bi tenê çavêن xwe vekirine di wê wexta ku xweşmîran hes-  
pêن xwe amade dikirin.

Di bin lepa taristana hézdar de, tevan, bi kûrbûn serêن xwe danîne,  
û gerok nêzikahiyê li xirecira şevê dikin, ev tu yî ey Cibrîl, wisa ligel Bûqa  
xwe bi tenha serê xwe di vê tarîtiyê de di çelê zivistanê de, digirî.

Na.. ev ez im, John Donne, ez giyanê te me, li bilindahiya esmanan  
şîniyekê li dar dixînim çînkî min bi dahêhana xwe raman û hestêن giran  
wek merbendê, afirandine.

û tu, bi vî barê giran tu şiyayî di nav reçkêşan û gunehan de bifirî..  
Na herê tu bi jortir de firiyyâ  
tu balendeyek bûyî lewra te gelê xwe didît,  
li ser hemî waran û li ser hemî panan te xwe li ba dikir.  
te hemî derya dîtin, hemî dûrêar,  
te ziq li dojeha hinavêن xwe temâşe dikir, te dojeh di şiyariyê de dîtibû  
wek ku çawan te bi zelalî behîş dîtiye, wek ku çawan di zortirîn  
çarçewêن şîniyê de,

Te hebûn wek dorava xwe didît, te li vê oqyanosa bêmînak temâşe dikir,  
her çar rex bi taristanê nixumandîne...tarî û giryân e  
te bera dû Yezdan bi xwe dabû û tu bi şûn de vegeryayî.

Lê ev barê giran astengan ji bo xwelibakirina te durust dikin,  
ku ev cîhan sed burc û rûbarêن wek werîsan e, ku mirov li jêr temas bike  
hetanî roja qiyametê ji ne ewqasî bi metîrsî dixuye!..!  
û ji welatê ku seqa lê nayê guhertin  
her tişt wek xewneke pûç dixuye, ji wir Xwedan wek çîriskek ronahiya  
ku ji pencereya mala dawîn a ku di mijâ şevê de xeniqiye, tê, dixuye..  
li wir bexçe raxistîne ku yekcar halet nehingivîne wan...  
ne hema ji çend salan ve lê ji sedsalan ve, li wir ji bilî daristanan nîn in ku  
mîna sûrêن xwaromaro rawestâyîne,  
û li ser gîhayêن bilind ji bilî baranê semageriyê nake.

û li wir, hespê zirav ê êzingvan , sergerdan e, di nav teraşan de dibeze,ji  
nişkê ve yê êzingvan, piştî ku hildiperike dara kajê, agir di rûbar de dibîne,  
li wir li dûr.

her tişt...Her tişt dûr e, li vir jî navçe nenas in  
û awira rewan hildiperike banên dûr,  
livir ronahiyeke dijwar heye,  
li vir mirov reyandina segan nabihîse,  
na û ne jî zingîna zengilan dibihîse.  
Lê wê bizanibe ku her tişt dûr e  
û biley dê hespê xwe ber bi daristanê ve bileyzîne  
û li vir û li vir, reşme, Erebana qeşê, şev, ew bi xwe jî,  
û hespê hejar dê bibin xewnek ji xewnê Incilê.  
û wisa va ez digirîm, digirîm...  
rêçek nîn e, qedera min e ku ez li keviran vegerim,  
çinkî vegera wek balendeyekî li min qedexekirine, qedera min e ku ez  
tenê mirî vegerim wir.

Erê...Erê , bitenha, piştî jibîrkirina te  
ey cîhana min a li ser erdê, a hêwî û jibîrbûyî, da ku jibermayê arezûyan  
bi eşdarî avjeniyê di te de bikin, da ku di wexta avjeniyê de bi xatirxwestinê  
re dilovan be.

Guhdar be...Wexta ku min bi giriyyê xwe aramiya te tevlîhev dikir  
berfeke zelal di taristana zîz de dibariya, kûrekûr  
ber bi dilovaniya jihevcihêbûna min û te ve radida  
lê derzî bi bizaveke jîr bi pêş de û bi paş de difire.

Ne ez... lê tu yî ey John Donne, tu kûrekûrê dikî, tu bi tenha xwe serî  
datînî, û lalî jî di nemliyê de serên xwe datînin,  
madam berf bi ser xaniyê mirî de dibare,  
madam berf ji wir bi ser taristanê de dibare.

Wek balendeyê ku di hêlinâ xwe de dihêwire,  
ku xwedî rîçen zelal e, xewnê jiyanek birûmet e, ku hetaheta  
bi stérkên li paş ewran veşartî bawer e,  
wek balendeyekî, giyanekî pak,  
digel ku rîçen zemînî mişt gunehkarî ne jî  
ji hêlinê qijalkan ên li ser xaniyê reşîlkeyên xwelîrengî yên vikîvala  
sadetir e.

Ewê di çesnê balende de, sibehan şiyar dibe,  
anuha di bin cawê sipî de serî datîne,  
madam berf û xewn qonaxa di navbera giyan û laşê wî yê mirî de dirêsin.  
Hemî tiştan serî danîn, lê belê du-sê  
helbest bendewariya bidawîanînê dîkin;  
bi tinazî, bi devê xwe yên bêdiran,  
evîna laşî wek erka dengbêjê ye  
lê evîna giyanî wek sifra keşe ye.

Kevirê êş yê bi dîwarê ji avê  
di her carê de dê heman tovan bihêre  
eger hinekan hevpariya jiyanê bi me re kir..Dê kî  
hevpariya mirinê bi me re bike?  
çarî bîqul e, yê ku bixwaze wê ber bi  
hemî dawîyan de radikişîne,  
diçe, carake dî dizîvire,careke dî radikişîne.

ji bili quba esman nîn e ku carina di  
taristana zîz de ristina derziyê distîne.  
De serê xwe deyne..De serê xwe deyne ey John Donne..serê xwe deyn û  
ji xwe bawer neke,  
palto biqul e...biqul e, li wir  
li ser çengel daliqandî ye  
lê temaşe bik...! û di nav ewran re li stêrka xwe  
ya ku di wan hemî salan de pasvaniya cîhana te dikir biger.

---

-**Brodskî:** Di sala 1940 ï de li Lînîngirad ji dayik bûye. sala 1972 an ji kevnevsovyête hatibû bidûrxistin.. Anuha li Emerîkayê dijî. Sala 1987 an xelata Nobel a edebiyatê wergirtiye.Bi zimanê rûsî û ingilîzî dinivîsîne, û gelek pirtûkên wî bi wan herdû zimanan hatine weşandin û wergerandin.

-**John Donne** (1572-1631): Helbestvanekî Ingilîzî pir bi nav û deng e, gelek helbesten dirêj wek rêça giyan û şirovekirina cîhanê nivîsandine. Damezirênerê dibistana mitafizikî di helbesta ingikîzî de ye.

-Yambo û Terakî du ritmên helbestî ne.

Wergerandina  
**Ehmed Huseynî**



# Palto

Nikolay Vasilyeviç Gogol\*



Carekê li bîroyekê li Petrogradê nivîskarek hebû, ew mirovekî hûrik bû, rengê pora wî bi sore ve bû û xwiya dikir ku dîtina çavên wî gelekî kêm e. Ew nivîskarekî ji pêpelûka nehan bû, ew weke wan kesen ku di çirokan de bi wan tê dikenin bû. Navê wî Akakî Akêkîvîc bû. Ti kesî nizanîbû, ka kê alîkariya wî kiribû, da ku karîbû bikevê ser vî karî de û yan jî kengî wî li vê bîroyê dest bi kar kiribû. Serkar wî û nivîskarên din diçûn û di hatin, lê ew her dem li yek cihî bû û yek kar dikir. Ev kar jî kopîkirin bû.

Xelkê êdî behwer kiribû ku ew bi vî rengî û bi wî paltoyê xweyî kevn ve hatiye ser rûyê dinyayê. Roj derbas diûn bêyî ku kesek guh bîdiyê, ta bi deregevanê li ber derî jî. Deregevan ti caran ji ber nedirabû û carnan silava wî jî nedivegerand. Serkarê wî ti caran rû nedidanê û bi qureti pê re dipeyivîn. Serekê nivîskaran ji bona nivîsandinê pelik didanê, lê bêyî ku ew li rûyê wî meyzînê, wî kar tavete ser masê, bêyî ku kesî zanî bû dide kê? Lê Akakî bêdeng dirabû û dest bi kar dikir.

Nivîskarên xort, yên li bîroyê kardikirin kenê xwe bi Akakî dikirin. Çîrok li ser çedikirin û jî pêş ve ji hev re digotin:

Xwediya xaniyê wî ya heftê salî lê dixê û jê re dibêjê ma emê kengî hevdû bikin. Pelik di ser serê wî re hûr dikirin, weke ku berf were xwar. Lê wî ti caran deynedîkir. ğ ku wî dev ji karê xwe berdida, ti kesî kembûn li cihê rûniştina wî nedidît. Carnan çaxê ku hevkarên wî ew gelekî têşandin û ndihiştin ku ew karê xwe bikê, wî jî wan re digot:

Dev ji min berdin, ma win ci ji min divin? Win çima win wilo li min dikan?

Dengê wî û gotinê wî dihiştin ku dilên wan pê bişewitê. Carekê xortekî nû hatibû li bîroyê kardikir, xwest ku weke herkesî pê bikenê, lê ji nişkê ve rawesta weke ku ji xewnekê şiyarbibe. Piştî hingî ew ti caran pê nedikenî û her dem ji xwe re digot:

Çima mirov birayê xweyî mirov hevqasî têşenê?

Gelekî zor e ku tu kesekî weke Akakî bibînî ku bi tenê ji bo karê xwe bijî û jê hez bikê. Karê wî cîhana wî bû, wî cîhaneye gelekî xweş di kopîkirinê de didît. Wî kêf, xweşî û şahî di nav tîpên alfabetê de didît. Rojekê serkarê dilpaqij xwest ku Akakî bibê cihekî baştar û karekî çêtir bîdiyê. Lê ev tişt gelekî li Akakî nexweş hat û wî got:

Ez dixwazim vejerim karê xweyî berê, kopîkirin ji bo min gelekî baş e.

Piştî wê yekê êdî kesekî nema lê pirsi û ew bi tenê ji kopîkirinê re hiştin. Akakî ti caran guh nedida cilan. Paltoyê wî dirêj, kevn û gemar bû. Çaxê di rê de diçû jî guh nedida titiştî û hay ji titiştî nedima. Toz û gemar bi ji penceran bi ser serê wî de dihate xwar, yan jî ku hespekî serê xweyî westayî danîbûna ser milê wî, dîse wî guh nedidayê û wî bi riya xwe de diçübûna. Dawî ku ew digeha mala xwe dirabû bi lez cilên xwe di guhar-

tin û xwarina xwe dixwar. Akakî ti caran guh nedida xwarinê jî, rengê wê çilo be, xweş be ya ne xweş be, wî lê nedîkand. Carna mês û gemar pê re dixwarin bêyî ku pê zanibe. Paşê ew diçû, pelikên ku bi xwe re ji bîroyê anîbûn kopî dikirin. Heke ti kar nebûna ewî ji xwe re ji kû bûna wî karekî derxe, lê divabû ku ew roja xwe bi kopîkirinê bibihûrênê. Wî nizanîbû ti mijûlayîyen din ji kopîkirinê pêve bike. Kesekî ew ti caran li şahiyekê nedidît. Lê dawiyê ew diçû nav livîna xwe û bidilxweşî li hêviya sibe dima, ka bê wê xwedê ji bo kopîkirinê ci jê re bişiyênenê.

Ev bû jiyan Akakî. Ev kesê ku sala karê wî bi çar sed rûbilan bû, lê dîse jî ew pê qayil bû. Belkî jî ku jiyana wî mabûna ta dawiyê, lê zor û zehmetiyêniyanê li pêşıya wî bûn. Li Petrogradê dijminekî dijwar yê her kesê ku sala karê wî ji çar sed rûbilî nebêhtir bû hebû. Ew dijmin ne ti kes bû ji serma bakur pêve.

Her sibeh ji seet heşt ta seet neh rê ji karker û xwedî karan têne dagirtin. Serma di vî çaxî de bêhvilan nivîskarê belangaz dişewitênê ta ku nizanîn bêhvilên xwe bixine kû de. Ew bi tenê karin xwe di nav paltoyên xwe de bipêçin û bi lez bazdine bîroyên xwe. Akakî pê dihesta, ku serma zor dide navmilên wî û li pişt û wî dixe, lê wî jî xwe di pirsî:

Ka ev tişt ji ber ci ye?

Çaxê paltoyê xwe danî ber xwe û baş lê meyzand, wî dît ku çend qul tê de çêbûne û ba bi serbestî di wan re diçe û tê. din zanî bû bê çîma pişta wî wan sibhan ji serma dişewitê. Paşê, wî biryar da, ku paltoyê xwe bibe ba Pêtroviç, ew terziyê zeîfi bi çavekî. Lê Pêtroviç hê zanîbû cilên belengzan bidrûyê û pînekê.

Akakî çû mala Pêtroviç. Bi rê de ji xwe re digot:

Gelo ewê dora çiqasî ji min bistênê?

Xwedê bike ku ew serxweş be ji bo gelek peran ji min nestênê?

Lê hêviya? Akakî ne di cihê xwe de bû. Pêtroviç neserxweş bû. Lê gelekî ne razî bû ji ber ku nikarî bû ta bi derziyê bike.

Akakî silav kir:- Roj baş!

Roj baş! Pêtroviç silava wî vegerand, û bi çavê xweyî yekane li tiştên di destê wî meyzand. Akakî nema zanî bû ci bêjê, lê got:- Pêtroviç, ez hâtime... meyz... ev.

Pêtroviç zanî bû ci dive. Wî rahişte, palto vekir, lê meyzand. Pêtroviç serê xwe hejand û got:- Ev nema çedîbe; nema hêja ye ez pêre biwestim.

Dilê Akakî hate xwar û got:- Çîma Pêtroviç? Meyzê, nav milan bi tenê qul bûye...

Lê Pêtroviç rê nedayê û gotvê ku ew nikare palto çêke, û dive yekî xweyî nû bidrûyê. Akakî ev tiştbihist û cîhan li dora wî zîvirî. Lê ji Pêtroviç pirsî, bê wê paltokî nû bi çiqasî çêbe?

Pêtroviç got:- Bi sed û pêncî rûbulî wê paltokî gelekî baş çêbe.

Akakî derket, derve weke ku di xew de bê, ew diçû û diçû lê nizanî bû diçe ku?

Bi xwe re di peyivî û di got:- Sed û pêncî. Ezê ji kû bênim? Lê çîma. Ti cara palto ne hêja ye sed û pêncî rûblî. g wilo ji xwe re got û got. Lê dawî geha biryarekê ew jî ku paltoyekî xweyî nû bidirûyê. Lê ma pere ji kû bênenê? Ev li ser şansê wî dimêne. Ku serekê bîroyê cil rûblî bidiyê wê gelekî

baş be. Ji ber ku çil rûbilên wî jî hene. Akakî di xwest gelek tiştan bi van peran bikire. Lê ji bo palto dive ku hemû planên xwe ji bîr bike.

Piştî vaqas salên kar Akakî çil rûbil bi tenê dabû hev. Vir de, wê de... dawî nêhta xwe lê anî ku palto bikire. Ji vê rojê pêve ti peran xerc neke. Xanî xwarina xwe kêm bike. Çaya êvaran nevexwe û mûmê bi şev pê-nexe. Wilo carekê çû ba Pêtrovîç. Piştî bazareke dûr û dirêj li ser heştê rûbilî li hev hatin, û kengî Akakî pere bênen ewê dest bi dirûtinê bike. Akakî ji wê rojê ve dihate malê ji dêl ku şîv bixwe xwe dirêj dikir û tanî ber çavên xwe kengî paltoyê xwe bênen û li xwe ke. Li hêviya paltoyê xwe bû weke ku li hêviya hevalekî xweyî delal be.

Roj li pey rojê di çû û hê perê peyde nekiribû. Lê rojekê serkar çiyan de jê re û şest rûbil danê. Ji ber ku karê wî her dem qenc bû. Akakî vegera malê bi şahî. Piştre rast çû ba Pêtrovîç û pere danê.

Sibehekê Pêtrovîç palto anî mala Akakî. Wî hew dizanibû êdî ci bike? Ew roj, ji hemû rojên jiyana wî bi këftir û xweştir bû.

Akakî palto li xwe kir û bi serbilindî çû bîroya xwe. Herkesî di zanibû ku Akakî paltoyeki nû li xwe kiriye. Pirozî danê de û gotinê de divê ku ew vexwarinekê bide wan. Akakî nema zanibû ci bikê û ci bêjê, lê serekê nivîskaran gote wan:

Başe, win hemû işev li ba min in. Emê ji bo paltoyê Akakî şahiyekekê bikin.

Akakî bi dilşahî vegera malê, palto ji xwe kir yê kevn anî ber û ji xwe re kenî. Li paltoyê xwe dimeyzand. Ew roj ya pêşî bû ku titişt kopî nekiribû. varê Akakî rabû, paltoyê xwe li xwe kir û derket, da herê mala serekê nivîskaran. Bi rê de Akakî li dora xwe dimeyzand û pişta xwe rast kir û bi riya xwe de çû. Dawî geha xaniyê serkar, ku li cihekî xweş bû. Xaniyekî xweş û mezin bû. Qelebalix ji oda rûniştinê dihat. Derî jê re vekirin. Paltoyê xwe jêkir û danî. Nema zanibû ci bikê. Lê wan zû ew dîtin û hatine pêsiya wî, lê ew zû jî ji bîr kirin û çûn bi pelikan leyistin. Akakî nêzîkî wan rûnişt, li wan di meyzand. Lê pişti kêlîkekê westa û xwest herê malê. Wan nehişt û şampanya jê re anîn. Akakî piştî vexwarinê dilxweş bû, lê dîse bê deng derket da herê malê. Akakî bi dilxweşî diçû. Li jinên xweşik dinerî û ji xwe re dikenî, ta geha tarika xweyî belengaz. Rê vala bûn, kesek li wan deran xuya nedikir û çend çirayên rehnikê didane wê ferehiya di nav xaniyan de. Berf li ser rê bû û dinya gelekî sar bû. Ji nişka ve kêf û şahiya wî çû. Li dora xwe meyzand ji berfê û xaniyê tarî pêve titişt nedît. Çavên xwe gitin da wan hew bibinê. Lê dîse xwest ku çavên xwe veke, da meyzênen ka hê xaniyê wî çiqasî dûr e. Wextê çavên xwe vekirin, du kesen bi simbel û dirêj li pêsiya xwe dîtin. Wî baş nedidît, lê hema pê hisa ku kulmek li sînga wî ket. Kir ku hewarî kesekî bike, lê kulmeke din li devê wî ket. Kulma sisayan li ûrê wî dan. Li ser pişta xwe kete ser berfê û bêhiş ket. Kêlîkek tê ve çû bi hişê xwe hat, li dora xwe meyzand ji berfê pêve nedît. Li xwe nerî dît ku paltoyê wî hetiye dizin. Bazda, hewar kire nobedaran. Kesekî lê ne-vegerand. Çû ba polisan lê bîroya wan girtî bû. Çû mal, lê nikarî bû raze.

Roja din ew neçû kar xwe. Ew cara pêşî bû ku neçûbû kar. Çû ba polîs, lê wan guh nedanê. Akakî pê hisiya ku ti alîkariyê nadînê de, roja din çû karê xwe. Hemû gelekî xeyidîn û her yekî şiretek lê kir. Lê yekî gotvê:

Baştir ji her tiştî ew, ku tu çiroka xwe ji mirovekî bi qîmet û xwedî nav û

deng re bêjî. Akakî jî bi şireta wan kir û çû cem mirovekî wilo. Ew nû zengîn bûbû û ew gelekî ketibû darî çavêن xwe de. Ji wilo jî çaxê Akakîyê belengaz kete bîroya wî de bi dengekî tûj û bilind pêre peyivî. Hişt ku ew di cihê xwe de bi mène û bilerize. Akakî nema zanîbû êdî çi bike, yan çi bêjê? Lê naskir êdî ku ew tiştekî jêre nake. Bi kul û keser jî cem derket nema hay ji dora xwe ma. Dibin baranê de di sikakê ve diçû û wê şevê Akakî neraza.

Tayeke giran ew girt û piştî du rojan ew mir. Xwediyê xanî ew bir veşart. Li Petrogradê jiyan digera weke ku tiştek nebûbê û weke ku Akakî ti caran nebû.

Mirovek mir, yekî ku kesekî ti caran guh nedabûyê. Ti xweşî û şahî nedîbû. Paltoyê nû her tişt bû di jiyana wî de. Palto şahî xiste jiyana wî de, lê ew şahî gelekî kurt bû. Bakî zer hat û her tişt bi xwe re bir.

Nivîskarekî din hatibû bîroyê cihê Akakî. Ew ji Akakî dirêjtir bû, lêbelê karê wî ne rind bû wek yê berê. Akakî mir, lê ne ev e dawiya çîrokê, jiber ko têbayê wî piştî mirina wî hê çend rojan dijî. Divabû, ko Akakî bê deng ji vê dînyayê neçê. Çîrokin li nav Petrogradê digeran digotin, ko têbayek bi şev li ser pira Kalînkî digere. Ew têba wek nivîskarekî hûrik e û li paltokî digerê. Paltoyên xelkê ji wan dike, êdî nema kes diwêrê diza bigrê ji tırsa, ko ew têba be. Careke karkerekî bi herdû çavêن xwe dît û naskir, ko ew Akakî ye, lê jê tırsa û bazda. Têbayê wî li Petrogradê digera û tirs dikire dilê xelkê de. Piştî wî mirovê binavûdeng berda Akakî ew pir poşman bû û rûyê rebenê Akakî jiber çavan nedîçû. Şiyande pey Akakî, lê Akakî hingî miribû. Çaxê wî bihîst, ku ew reben mir weke, ko bakî zor lê bidê û bêhna wî biçikînê. Da ew vê çîrokê ji bîr bikê, rabû çû şevbuwîrkekê li cehkî şâhiyê. Gelek kes li wir hebûn hemû zengîn û navdar bûn, şampanya vex-war û şev bi xweşî biwart. Dawî li paytona xwe siwarbû, gote paytonçî, da wî bibê mala hevalê wî. Ew şeva xweş tanî bîra xwe, lê ji nişkê ve mirovekî ew ji pişt ve girt. Lê nerî, dît mirovekî hûrik bi paltokî dirêj e. Ew Akakî bi xwe bû. Rûyê wî weke cawekî spî bû û dêhnê têba lê diket. Têba gotiyê, ko tu ketî nav destê min de. Te alîkariya min nekir, da ez paltoyê xwe bibînim. Te dengê xwe li min bilind kir, ez jî ezê paltoyê te bibim. Wî kir ko ji tırsa bimirê û ji hingî pêde hew deng li tikesî kir û wek berê negot:

Tu dizanî tu bi kê re dipeyivî, tu dizanî ez kî me?

Hê jî xelkê behwer dikir, ko têba li tarikên Petrogradê bi şev digerê. Lê vê carê ew têba ne hûrik bû, ew dirêj bû û simbêlên wî hebûn. Wî bazdida û di reşa şevê de winda dibû.

\*Nikolay Vasîlyevîç Gogol (1809-1852) nivîskarekî rûsî bi nav û deng e. Gogol gelek çîrok nivîsandine. Ji wan: çîrokên Petrogradî, Vladîmirê Pêpelûka Sisiyan, Revîzor, Canêñ Mirî, Palto û yên din. Çîrokên wî kenê di nav hêstiran de ne. Di salêñ temenê wî yên çili de bîr û behweriyêñ kevneperek lê xwiyakirin, wek di çîroka Cihêñ Bijartî de û di nameyêñ wî de, yên ji dost û hevalêñ wî re. Komeke nivîskarêñ rûs yên bi nav û deng, yên rexnevanêñ reyalîst li pey şopa Gogol çûn. Ew li Rûsyâ bi navê Dibistana xweristî hatibûn binavkirin.

Wergêr:  
Narîna Haco

# Valahiyekê sênckirî

---

## Tengezarê Marînî

---

Bila  
di bin sîka te de  
rakeve.  
Destê vî penaberî berde.  
Bila bêje: Dîlbera min /Mêya min  
rê bîdiyê  
xwe tazî dike.  
Xak tî dihêwirîne  
Ez û tu dibin  
şahidê mirina asîman û rûzemînê  
Birûskên windabûnê, tu direvînî.  
Tu, yên mê didin pey te. Tu jî  
tipan tînî bîra xwe.  
Mîna zarokekû/  
bi dilê zarokekî  
Qehfikên te, hinarkên  
çêm radimîsin.  
Bi têlên xewneke nîv sax û nîv fetisî  
wêneya Xecê bi kenar dikim  
Li ber derfeşa Baxos kasê tazî dilorînim  
Siyamend şûrê xwe, yê guh li zengelora kehniyê  
diherhitîne  
Ev mirine, cihê her kesî li ser xaka wê heye.  
Ji ziwapûna çemê helbestê,  
bişirînekê dihinêrim, A, bêya xwe digindirînim  
Brokrostekî din, bi wê hovîtiyê rêka xwe çareser dike  
Bi dostanî/ Bi sultanî dixwaze  
tipen me/ Laşen me  
veke.

**BROKROST:**

Qunaxekê, qehpîtiya xwe/  
pozbilindiya xwe  
biçîne/ tê de bigere  
li ber lingê mindal  
keskesorê parça parça dikan.  
Reng xwe vedidizin, li cihekî bê Dîktator digerin.

Tenê reş

Reş serî hildide/ xebxeb ji qirikê dertê.

Ev dem.

Ev ziman, ez li wan xwedî derdikevîm

Helbesta min/ evîndara min

Em bi dilekî şikestî xwe azad dikin

Hemî tîp, ji bîlî sî û yek tîpî me dax didin  
careke din bang didim

Werin...werin

Hetîketiyêñ min diyar bikin

Zexeliya xwe jî li hember deynin

çî bikim...!?

Ez zanim, nêrgiz li ber hêşirên min şîn dibin

Ez zanim, zilîdar e tama hîqehîqa wan

Agir: cihê hêşir biramîse, tu nesotînî

Nizanim, gelo ev xewn in yan jî serpêhatî ne...!?

Piştä min, dilop dilop bîranînan

dadixîne.

Libelib aso dikizire.

Girîgeh lêgerînekê/ bêdengiyê

pîroz dikin

spêdeke bêgazin

diparzinînin.

Laşekî min heye.

û tiştekî din jî heye...

Tevan ji we re dihêlim

Ez û tîpêñ xwe, em ê di dengê mîkewekê de,

melevaniyê bikin

15/09/1994

# Newafo

---

## Nîzar Agirî

---

Tu kes dê ji bîr neke. Dema ez ji we re bibêjim, her kesê ku di wê sibehê de ew dîmen dîtibe dê tu cara jibîrneke gerek hûn ji min bawer bikin; renge hetanî roja dawîn ji jiyana xwe ji. Ne hema tenê kesên ku bi çavê serê xwe dîtibûn lê hemû xelkên bajêr, Hetanî ew xelkên ku di sibeha wê rojê de li ser eniya wan nehatibû nivîsandin ku li Erasa bajêr peyda bibin ji dê ji bîr nekin; Erasa ku hergav mişt sidoqên şînkayiyê û çewalêن hejîran û genim e, mişt teneke û çerm û erebanêن textîni û rêxa dewaran e.

Erê, hemû xelkên bajêr, ji xwe wek ku hûn dizanin bajar piçûk e, mane tiştên herî balkêş tê de Sinemeya zivistanî ye, û kolana cilûcaw e û Erase ye, erasa ku bi ser rexê bakur de vekiriye, ku ciyayên bilind û pira mezin û qereqola ebedî xwe ji bo temaşevanan li ba dikin, ji xwe hema ku tiştek li rexê rojavayî bajêr li alî leşkergehê biqewime, di cih de, nûçe digihêje rexê rojhilatî bajêr alî Mîrayê, wisa mirov dibê qey hemû xanî bi kunine nediyar di dîwarêن xwe de bi hevûdû ve hatine girêdan.

Lê ci qewimî bû? Bêguman hûn dipirsin. Ax! Wexta ku ez ji kolana ês ber bi Erasê ve çûm, wek hergav deng bilind, tevlihev dibûn. Elîko bi hêrseke dijwar bangî rîwiyan dikir da ku li sebz û şînkayiyên wî yên ku ji gundê KERENGO hatine temaşebikin. Çeta ji sündên mezin dixwarin ku hê tu kesi di dunyayê de ji Kebabên wî xweştir çenekiriye. Sofî Gundoro ji bi xêliyan, bi kevneperçeyên entike barkirî bû, devê xwe yê bê diran vedikir û bi dengekî ketî li zarokekî windayî dipirsi,

Dema ku min nêzîkayî li nangeha Selîmo kir, min xelkên ku di nîvê kolanê de bihevûdû dehifdan mîna xelekekê çêkiribûn û li hevûdû kom bûbûn, dît; carina dengê kenê wan bilind dibû û carina ji dengekî dijwar dengê kenê wan dibirri; tev pê dihatin nixumandin, piştî wê dîsa dengê ken bilind dibû.

Ax! Min ji xwe re got, kuro ev Newafê dîn e. Min bilez berê xwe da koma xelkê. Min serê xwe bi kotekî di bin çengê yekî re derbas kir û min li hundire xelekê nêri. Newafo di nîvê xelekê de bi cilûbergên xwe yên nas-kirî rawestiyayî ye: Taximekî leşkerî bê quşûr. Şerwal û gumlek û kumekî bi qertel û li ser milan stêrkên zêrînî û li ser sîngê nişan û xelat û alen rengînî. Lê vê carê ne wek ku ez wî nasdikim, ne kêfxwêş bû; nedikeniya. Li dora xwe dizîvirî, gêjo- mêjo dibû, tif dikir, kumê leşkerî li ser serê xwe diediland. Ji xwe Newafo carekê bi vî taximê leşkerî serokê nû yê belediyê xapandibû.

Ji serok weye ku Newafo serleşkerekî mezin e lewra bi rîzgirtin rawestiya û silavek leşkeriyane pêşkêşî wî kir, lê dema ku kenê rîwiyan bihist

Şaşîtiya xwe naskir li turimbêla xwe siwar bû û ji ber çavan winda bû. Ne-wafo ji bi serbilindahî; bi devekî vekirî û bi bişirîneke pan rêça xwe berde-wam kir.

Lê anuha ne kêfxweş e, rûyê wî bêzar û tirş e, çavên wî xemgîn in, ve-mirtî ne. Pitepita wî bû. Destê xwe bilind dikir û ji nişkê ve diqîriya:

-Wa têñ, wa têñ!

Sînga xwe dabû ber kulman , hetanî ku jê dihat lingên xwe li erdê dixis-tin, radiperiya, kef bi deva diket û digot:

-Tîrsonekino dê bera we din, dê bera we din!

Tûyî hemî rexan dikir, destê xwe mîna ku dê bifire dirêj dikirin, û bi harbûn di xeleka teng de li dora xwe dizîvirî, hin dikenîyan, hinan jî bi pey-vêñ ne zelal kurtepist dikirin.

-Dîno bêdeng bibe, kuro dê te bikujin lao!, yekî got:

Lê Newafo lerizî, li ber pêlên ingirandinê hejiya û bi sergêjahî digot:

-Kî dê min bikuje, kî dê min bikuje?

Roj ber bi nîvro de diçû, hêdî hêdî dilopêñ baranê dest pê dikirin, xelkê xwe ji boyî çûnê amade dikirin, herweha xelkê gundan jî bi hêmînî di vege-ra xwe de diramiyan.

-Newafo, birev kuro waye polîs hatin.

Me hemiyan bi hev re serê xwe bilind kir û me li alî kolana Belediyê temaşe kir. Hêdî hêdî turimbêla reş ber bi me ve dihat. Yeko yeko me xwe ji xelekê vedizî û me xwe li her sê çar rexan belav kir, li koşeyan, li ber dergehêñ firoşgehan em bi cî bûn.

-Ez birevim!? Ez birevim!?

Bi tenha serê xwe, wek dareke rût, di kolanê de li ba dibû, kef li dora lê-vêñ wî kom dibû. pitepita wî ranediwestiya, digot:

-Wa têñ, wa têñ, Xemir. . Xemir!!(1)

Turimbêl rawestiya û du polîs jê peya bûn. Yekî ji wan bi NEWAFO girt, bi hêz wî dehfda, ket erdê. Yê din werîsekî dirêj anî, lingên NEWAFO girê-dan, û werîs avêtin dawiya Turimbêlê.

Turimbêlê jî berê xwe da rexê qereqola belediyê.

Kî dê dengê Newafo ji bîr bike; dengê tûj, jihevketî, dengê birîndar, kî dê terpirepa wî ya li ser erda wê kolanê bi dû turimbêla ku bi bêagahî ew dikişkişand, ji bîr bike!?

Kî dê wê matmayîna req a ku bi ser rûyê xelkê de dabûbû; xelkên ku li koşeyan rawestiyabûn û bi bêdengî çavdêriya bûyerê dikirin, ji bîr bike!?

(1): Xemir: Erebêñ ku di sala 1973'an de li Kurdistana Suriyê hatin bi cib-kirin.

# NAAA!!!

---

Ehmed Huseynî

---

-Bo hunermend Ciwan Şêxo-

Tu çawan bîra mirinê bûyî?  
Hey zalım! Tu çawan hînî bilêvkirina xatirxwestinê bûyî?

Min digot:

Nebêjin, na nebêjin!

Vê resgirêdanê ji nû ve bi ser newqa qonaxê de nerêjin.

Dil bi pizota oxirê, na hey zalmö! de bila çûkên li ser kaja kenê te bi gurîna xatirxwestinê nepêjin...

Min digot:

Henasa şevbuhêrkan hogirî dûmana lêvên te dibû,  
lavlava şermezariyê hildiperikî keviyên kovana te,  
velerzîna bazbendan di şiverêyên xewna te de diqurifi,  
em li ber asîtanka bisaftina te berzûrî rûperî û dîlberan dibûn,  
û di taristana berfireh û navdar a çavê te de û di goristana brîndar a navê  
te de, di daristana lez-gavê te de, di aheng û saz û awaz û di çeregeha ron-  
dikên te yên derengmayî de

me bêdengiya xwe , me agir û pêtî û diltengiya xwe bi ser êvara dilê te  
direşandin û em diqîriyan:

Ji bo ci ey Xweda?

Ma ne ji ber xwe ve dê orga gunehkar di dilkê dil de biteqiya!

Ma ne ji ber xwe ve dê di pirtûka rojan de û di kezeba gulan de mirina  
çav reşan binimiya!?

Mane ji ber xwe ve dê dar bê bager,  
dê şev bê huner,  
dê pencere xemgîn,  
dê sirûd reşbîn û bê zingîn bimînin,  
dê ciwanekî bi tenha, bengîn û şeyda,  
bi ser qeşmeriya axa sar de bigiriya?!


Min digot:

De rabe hey zalmö dev ji laqirdiya mirinê berde!

De rabe! Nebûna te ji boyî harmoniya talanê kul û derd e!

De rabe! Da ku hezar stiran di şeva Qamişlokê de  
bi hev re ji dayik bibin!

De rabe da ku şûna helbestê di hişê tirsê de,  
di damarên pirsê de  
bimîne



Nizanim kî me ez  
Ji bo çi dijîm ez  
Zanim ku rojêñ min û  
Dostêñ min û jîna min diçin bi lez.  
**Ciwan Şêxo**

Da ku Heleba kevnar rondikêن te di gupîtka gizingê de hilîne...  
De rabe da ku bîranînê te ji me re nebin sêdar!  
De rabe daku tiliyên te xwe li gerdena xatirxwestinê nealînin,  
nebin koremar!  
De rabe goristan sar e, dengbêj civiyane, sibehe bê te nabe.  
Bîna qehwê gerek bi ser bişirîna te de dabe,  
Min digot,  
nebêjin, na nebêjin:  
Ma rast e ku anuha bi tenha xwe dimîne, bêyi me, bê piyano, bê tütin,  
bê xewn û bê lîska bi zarokêن Taxa Xerbî re!!?  
Ma rast e em hew rûniştina wî, destşûştina wî, biraştina wî, dibînin ?!  
Em hew hêsrên germ, ji çavên wî, bi ser hinarkêن şevê de diherikînin ?  
Ma rast e ku ew tilî dê bê bizav,  
ku lêvên xweçik dê bê xunav,  
ku çavên bê xew dê bê sîtav,  
ku êş û newa û kew dê bê şîrav bimînin?  
Ma rast e ey hawar! Ku em dê kulîlkan ji xweliya serê çiyan daweşînin  
û li ber serê sazbandan , bi navê koçer û revandan biçînin!!!  
Ma rast e ku derza dilê me dê li van dûrewaran bi mirina te jî biderize,  
ku giyanê me dê di nav zixtêñ kêra kêla te de wek çûkekî birîndar  
bilerize!!?

Min digot:  
Ji kuç û kolanêñ dudil re, ji paytextêñ bêzarî û ji müşextiya gawir re,  
ji barana destê sibê re,  
ji roka ber êvarê re,  
ji keskesora çavê miriyan re ,  
ji stêrkêñ westyayî yêñ esmanê havîna werz û bîstanan re,  
ji xirecira xwêdana sermest ya govendgerînan re,  
ji serkêş û dastana birînan re,  
ji toza dilnerm a li ser zuha-bışkojêñ nîsrîn û gulçînan re  
bibêjin!

Na Ciwan na!


Destê xwe ji destê me nerevîn,  
zêr tiliyên xwe ji gerdeniya piyanoyê berned!  
Bi awirêñ xwe yêñ mehreban jena ku di dil de maye nesotîn!  
Ji nû ve xwedanê şîniya giranbuha di tengerêyêñ xwîna şikestî de ne-  
livîn!

Ronahiya me bi tenhatiya gorê ned!  
De rabe teniko!  
De rabe xweşiko!  
De rabe jiyana ku ji ber axînan maye, bi birîna koçkirinê,  
bi ser serê xewna me de neherifîn!  
De rabe bi hestêñ narîn , bi gulbarîn, sirûda xatirxwestinê,  
di hişê bêrîkirinê de biteqîn!

Min digot:  
Ma we tiliyên wî bi kesera me hine kirine?

Ma we gulava bîranînan,  
"Narînê hey Narîn"  
"Tolikvanê Meyro"  
Bi ser canê wî de dakirine?  
Ma we gulek berbero xistiye bin serê wî?  
Ma we ber bi şîniya çiyê de vekiriye berê wî?  
Ma tem û awran, nermebarana fedyokî,  
li ser serê wî dililandin?.  
Ma kevokên bejî û hechecikên me jî,  
xwe bi ser darbestê de diçemandin?.  
Ma we tembiya wî li kulîlkên buharê kiriye?  
Ma we lepêñ sevê jiber devê goristanê rakiriye?  
Ma we hêsrêñ me xerîb û sêwiyan li tevlî hawarêñ xwe kirine?  
Ma we jê re gotiye:  
Ku mirina te Ciwano jibo me herroj mirine?

2/2/1995



# Pirsa Gelê Kurd Li Başûr-Rojavayê Kurdistanê

Rastiya hebûna gelê Kurd li Sûriyê ji berê de ye, ji berî ku Sûriya bibe dewlet e û iro ji rastiyekê mezin e li ber çavan. Di qonaxên pêvajoya Sûriyê de, gelêkurd, hertimrola qencî û rindiyê listiye, ji paş ve li kesî nedaye û hergav bi çavêndostanî û biratiyê li derdora xwe nihêriye. Lê mixabin siyaseta dewleta Sûriyê her û her li serê xwe siwarbûye û dibêje "na", Kurd li Sûriyê tune ne û ji bona bicianîna vê siyaseta tunekirina Kurdan û veşartin û bincikkirina rews û rastiyên hebûna kurdan dewleta Sûriyê kiryar û siyasetên jêri dane ber xwe û bikaranîne:

*A-Di warê rikgîriya di derheqa çand û zimanê Kurdi de:*

1-Guhartin û erekbikirina navênsedêngund û bajarokênkurdan li herêmênkurdî, ci li parêzgeha Helebê (Afrîn û Kobaniyê) û ci ya Hesekê (Cizîrê).

2-Qedexekirina bikaranîna zimanê Kurdi û rîgirtin li ber vekirina dibistanan bona zimanê Kurdi an navendênkulturî.

3-Qedaxekirina çapkirina kovaran bi zimanê kurdi.

4-Rê li ber muzîk, stran û folklorâ Kurdi di programên izegeh û televizyona súrî de girtî ye.

5-Çavdêri û kontrola dewletê li ser nivîsarên wergerandî di rojnamên xwe de, peyva Kurd û Kurdistanê ku, carna di rojnamên europî de bikartê, ji ba xwe ji holê dirakin û peyyine din ji ba xwe bikar tînin.

6-Zêdekirina tengasiyên li pêş dê û bayân kurd, gava ku, dixwazin zarokênxwe bi navênkurdî bi nav bidin û herweha navêncîgeh û dik-anan.

7-Çembabikirina belabûna stranênkurdî û bi taybetî ên Şivan Perwer û wekî din.

8-Beyî destûreke taybetî li baldezgehênparastina dewletê, zarakênkurdan ên nûbûyî nayênnivîsandin.

*B-Di warê civakî û hunerî de:*

1-Qedexekirina navend û komelêncivakî di herêmênkurdî de.

2-Qedexekirina komik û çalakiyên sportê di herêmênkurdî de, yan jî divê di bin kontrola dewletê û partiya wê ya serdest de bin.

3-Qedexekirina dezgehênxêrxwazî û rindiyê di herêmênkurdande.

4-Bergirtina sînema û tiyatroya Kurdi

*C-Di warê kar û zanyariyê de:*

1-Her sal, bi kêmanî, bi dehanxortênkurd ji mafê bi serîkirina xwendina institûtênavincî tenêbeparkirin û li erdêdimîn.

2-Karmend û karkerenKurd di dezgeh û fabrikêndewletêde, hertim cihênguhaustina bê? û avêtina yekser jî karin.

3-Bêparhêştina xwendekarênkurd ji wan berhem û kursiyênxwendina bilindku, ji Sûriyê ne li gor protokol bi dewletêeuropî repeyda dîbin.

4-Qedekirina hebûna karmendênkurd, di dezgehênkurdîne û diplomatde.

5-Qedekirina pejirandina xortênkurd dizanîngehênlêşkerî û bi taybetî di yêncîgehderyayî û firokîde.

6-Tinebûna institut û zangoyan li herêmênkurdî, gelek xwendevanênkurd, bi taybetî keç, neçarî

berdana xwendinê dike.

#### D-Di warê ekonomî de:

1-Dewlet dest datîne ser erd û zeviyêñ kurdan û li ser êrebêñ ku ji cihêñ dûr anîne, belav dike. Tu hâtina aborî ya kurdan namîne û ji neçarî herêma xwe berdin.

2-Berbendkirina kirîna erd li ber kurdan, belko didin ereban.

3-Ew Kurden ku li gor zagona 93'yan a 5.10.1962 bûne "ecnebi", ji mafê kar, milk, derketina derive, kertêñ temwînê û gelek tiştên din bêpar dimî-nin, lewra ji jiyana wan dijwartir dibe.

4-Kêmbûna warêñ kar û berdana kurdan ji kar û dibistanan bêkariyê dighêne dora 75% li herêmê û bi taybetî di nav jinan de. Lewra ji herêmêñ kurdan li paş dikevin, xelk jê bar dikin û bi nexweşiyêñ civakê li wir peyda dibin.

5-Her çendî medeyêñ xav wek genim, pembo, mîtal, petrol û tiştên din ji li herêmêñ kurdî henin, lê tu fabrike û karxanêñ hatin û çekirinê li wir tune ne û nayêñ lêkirin, lewra ji problema xizaniyê dijwartir dike.

6-Di warê kar de li herêmêñ kurdî pêşkeşiyê didin kesen şoven û wan di ser kurdan re digrin.

7-Kêmbûna nexweşxane û klînpkan li herêmêñ kurdî.

8-Intirastruktura herêmêñ kurdî geleki ji ya herêmêñ Sûriyê din paşketitir e û rê li ber pêşketina ci-vakî-ekonomî digre.

#### E

1-Herçendî çavkaniyêñ avê yên herî zengin wek çemê Ferat Dicle û xabûr di herêma kurdî re derbas ji dibin, hîn piraniya çandî ya kurdan li ser baranê ye. Ew ji ji ber tunebûna sistemeke avdanê a nûdem li wir.

2-Bikaranîna dermanêñ berbendkirî li dij nexweşî û kurmikêñ çandiniyê, xwê di erdê de pirr

dike, avê gemar dike û tilür û kêzikan dikuje û herweha gelek nexweşiyêñ nuh li herêmê peyda dike.

3-Bêserûberiya kolana bîrêñ eritiwazî û tunebûna piştgiriya dewletê ji çandina daran re, ava binerdinizim û kêm dike û ew ji dibe sede-mek ji yên zuhabûnê û pêşdehatina berîye.

#### F

a) Li gora zagona 93'yan dewleta Sûriyê hemwelatiya (cinsiyet) bêtirî sedhezar kurd di 5.10.1962'an de ji wan kişand û gote hûn bêgane ne û nema hevwelatiyêñ Sûriyê ne. Jimara wan niha piştî 33'yan ji 150 hezarî pirtir bûye û niha wek hingê her ji hemû mafêñ bajartî û mervuvatî bêpar mane. Ne mafê kar, xwendin, bidestxistina milkan yan avakirina tiştekî, ne mafê bidestxistina pasaportê û derketina derive, ne ji çûna otelan. Her weha wan maf tune bi fermî mehra şikirinê (zewacê) çêkin, navê zarokêñ xwe yên nûbûyî deynin. Helbet nabe ew beşdarî hilbijartinan bin. Jixwe hema hinek vê çavşoriya nijadper-est bînin zimên ew têne girtin û gu-nêhekê mezin dikeve hustên wan, eş û lêdana hovane li wan tête ki-rin. İro ji gelek welatparêzen kurd ji ber vê yekê di zîndanan de ne.

b) Bi armanca guhertina demografiya herêma kurdî, dewletê planê "kembera erebî" danî û ji bo wilo dest danî ser erd û zeviyêñ herî bas ên cotkarêñ kurd li Cezîrê û ji wan stend. Piş re li seranserî sînorê xwe yê bi Tirkîyeyê re, bi dirêjiya 375 km. û firehbûna 10-15 km., dewletê gundin modern lêkirin û sala 1973'an ereb ji dora bajarê Re-qayê anîn wan gundan. Yek buhist erd di destê wan cotkarêñ kurd de nema û bi çavê birçî dibîne çawa xerîb xêrûbêra erdê bavûkalê wî hiltînin û zarokêñ wî tazî û birçî ne.

Ji bilî van tevdîr û siyasetêñ

dewletê yêñ taybetî ku, di derheqê gelê me yê kurd de li Sûriyê têne bi karanîn, û ji bili plana kembera erebî ya kirêt ku, li gor ya ku wê bi deh hezaran ereb ji derveyî parêzgeha Cizînê anîn û di nav çavêñ kurdan de bi cikirin piştî ku, erdên tevrî baş û avî li wan belav kirin. Bi ser de ji ji sala 1962 an ve cinsiyeta bi dehêñ hazaran (iro hijmar digehe 150 hezari kurd li parêzgeha Cizîrê hatiye qapirandin û dizin. Vêca yekser ji hemî mafêñ qanûni û mirovane hatine bêper kirin. Ne mafê kar û xwendinê ne mafê xwedibûna traktor an ji parçek erd heye. Ne mafê lêkirina avahiyekê û ne bi fermî mafê nehrkirinê heye. Ne ji mafê bidestxistina pasportê û derketina derveyî Sûriyê heye.

Bi salvegera vê problêma daxuyaniyek û belavokek li Sûriyê ji raya giştî re hate belav kirin. Ji ber wê welatparêz kurd gelek hatin girtin û êş û lêdan dîtin. Iro ji gelek gitiyen ji ber xebatêni siyasi di zîndanen Şam û Helebê de diminin.

Baş dixuyê ku miletê kurd li Sûriyê di bin zor û setema siyaseteke şovenî û çavşoriyê de diji û pişaftin û jihevxitina kurdan ji zû de bûye armanc û siyaseta dewletê ya fermî û ta iro ji her berdewam e, lêbelê li beramber vê siyasetê gelê kurd roj bi roj bêhtir li doza xwe ya milî xwedî derdikeve û ji ya xwe naye xwarê.

Gelê kurd li Sûriyê ne tenê li doza xwe ya milî xwedî derdikeve, lêbelê bi camêri, bêdudilî û bi sîngeke fereh tevgera xwe ya demokrat, kurdperwer hembêz dike û ji fedekariyê re hertim amede ye.

Rewşa gelê me û pêdiviyen xwe ragirtinê li hember siyaseta şovenî, dihêle û divê bihêle ku, rîexistinê tevgera netewî ya kurd li Sûriyê destan bidine hev û mil bi mil li ser bingeha xebateke bêdudilî, li doz û daxwaziyen gel xwedî derkevin, da

ku, xebata gelê kurd bête nûkirin û gavêñ bi pêş de bêne avêtin. Slogan kerek e ew be ku ëGaveke kar û xebatê çêtir e ji tonek programê bê bizav.

Guhartinê mezin û ne di bir û xeyalan de, ên ku di rewşa siyaseta navnetewî de peyda bûne, piştî têkçûna rista dewleten ku bi navê sosyalizmê dihatin naskirin û gelektişt serûbinî hev bûn. Di vê pêvajoyê de gesbûn û rabûna pêla demokrasiyê û berxwedana bona maflîn mirov û gelan baş dide xuyakirin, ku xebata gelê kurd li seranseri Kurdistanê geştir û gurtir dibe. Destkeftiyen li başûre Kurdistanê -hukumeta federal û parlamenta kurdî-navnîşaneke mezin ji kurdan re ye, lewra ji parastin û nûjenkirina vê destkeftiyê dibe û divê bibe erk û barê hemî hêz û partiyen kurd li seranseri Kurdistanê û ew şerê birakujiyê ku li Kurdistanê peyda bûne şerekî xwekujiyê bi xwe ye.

Li rojhilate Kurdistanê têkoşin û berxwedana gel her li ci ye û roj bi roj geştir dibe, tevi ewqas dijwarî, û hêrisen terora rîjima Tehranê ya diktator, şerxwaz, xwînrêj û paşverû.

Her weha li bakurê Kurdistanê ji hêris û çavşoriya dewleta Angerê li diji gund û bajaren Kurdistanê, digel rîgirtin û destdirêjiyên li diji xebat û berxwedana rojnamevanî, demokratik û aştiyane û destdana ser parlomenteren kurd, û ji hev belavkirina wan û bi ser de ji, bombebaran kirin û hêrisen hov û dirinde, û koçkirina bi sed hezaran kurd bi hêla rojavayê Turkiyê de tevi va bûyerê rojane, disa ji gelê Kurd dev ji ya xwe neberdaye û her û her li doza rîzgariya xwe xwedî derdikeve û li berxwe dide rûresî ji dewleta Turk re dimîne.



**DUGIR** Kurdisk litteratur tidskrift

Box 3437, S-165 23 Hässelby -Sweden

---



Tahsin Taha ...

## *Oxir be dengbêjo!*

*Her ku baskên stiranê hingîwîn  
roavahiya xewnê,*

*oxir be!*

*Her ku bêrîwanêñ xewn-şikestî  
bêriya guhanêñ azadiyê kirin  
oxir be!*

*Her ku ahenga şîniyê hejiya û  
bi ser gulvedana çiyan de rijiya,  
oxir be!*